

同安縣志卷之二十八

鄉賢錄

一代之人材國家之運會因之雖僻壤遐陬而學問文章功名道德自足以彪炳寰區增光史冊邑自歷代以來賢才輩出或以理學名或以風節勝或以循績傳或以廉能著罔不蔚為國華尊為道範良由風俗敦尚禮義服習詩書以學問為事功故能有猷有為有守以為世用也茲就其功業道德政治言行之賢能表著者悉紀於篇俾後之讀者咸知景仰前徽而有觀感興起之念焉作鄉賢錄

宋

蘇紳

蘇頌

石互

吳燧

陳綱

宋

宜

顏五郎

石賡

石元

林棐

劉

達

謝圖南

郭巖隱

劉孟虎

王南一

曾

秘

許衍

薛舜俞

薛舜庸

吳子斌

許

巨川

許伯詡

柯南起

元

郭可大

明

林希元

楊逢春

傅鎮

劉存德

洪朝選

同安縣志

卷之二十八

人物錄 鄉賢一

陳

道基

李獻可

蔡守愚

蔡復一

張廷拱

林

一柱

林鈞

彭用乾

陳福山

林賢生

黃

廣

葉錄

葉蕩

楊舜

張俊

蔡

煥

蘇桂

許廷用

黃江

洪兢

楊

喬椿

蔡懋賢

蔣孟育

陳則采

許光卿

劉

夢松

張繼桂

周源

林啓

丁華

黃

偉

林應

黃驥

黃良弼

許勛旻

謝

崑

王佐

陳健

林大梁

蔡宗德

呂

文緯

盧天祐

王時拱

李春芳

王三接

林

叢槐

張應星

黃傑

郭夢得

陳榮祖

蔡

貴易

池浴德

李鈿

葉明元

林一材

洪

邦光

李文簡

陳榮選

黃文炳

蔡用明

張

日益

王道顯

蔡獻臣

黃華秀

郭日烜

陳

基虞

柯鳳翔

胡明佐

林應翔

陳穀

蔡鍾有	洪纖若	蔣芳鏞	池顯京	林宗載
周家椿	周爾發	陳如松	蘇寅賓	張朝綱
康爾韞	葉成章	劉夢潮	劉廷憲	黃其晟
陳昌文	盧經	陳文瑞	張璫	蔡國光
林鳳儀	張朝縉	郭貞一		
清 張汝湖	陳觀泰	劉夢齡	劉佺齡	許元鏞
陳睿思	劉球瑛	陳夢球	張金友	洪心澄
陳還	洪淳瑛	池繼善	許承澎	莊仰旻
郭展縉	林雲嵐	陳鵬南	葉沈翥	林翼池
劉承業	劉瀚	陳鳴佩	劉先登	劉宗成
童浚德	蘇廷玉	蘇瑞書		

宋

蘇紳字儀父初名慶民天禧三年進士歷宜安復三州推官改大理寺丞母喪寓揚州州將盛度以文學自負見紳文驚服由是知名再遷太常博士舉賢良方正科

同安縣志

卷之二十八

人物錄 鄉賢二

擢祠部員外郎通判洪州徙揚州上十議進直史館爲開封府推官三司鹽鐵判官時衆星西流代地大震方春而雷詔求直言紳上疏極言時事安化蠻蒙光月寇宜州敗官軍殺鈐轄張懷志等六人紳言今日之患由往者守將失計而國家姑息太過此時可緩圖不可速取請命轉運使備數年兵食爲持久計扼其出路俾進無所抄略伺便卽搗其巢諭其送款且詔旁近諸蠻毋得相援獲首級卽行優賞不出一年逆寇必就殄滅朝廷施用其策遣馮仲已守桂州經制之蠻遂平又陳便宜八事曰重爵賞慎選擇明薦舉異章服適才宜擇將帥辨忠邪修豫備帝嘉納之進史館修撰擢知制誥入翰林爲學士再遷尙書禮部郎中王素歐陽修爲諫官數言事紳忌之會京師閔雨請對上言國之號令不專於上威福之柄或移臣下虛華憤亂故其咎僭厥罰常暘意以指諫官也諫官亦言紳舉御史馬端非其人改龍圖閣直學士知揚州復入爲修撰權判尙書省紳博學多智喜言事銳於進取顧亦善中傷人改集賢修撰知河陽徙河中未行卒葬於丹陽祀鄉賢

賢子頌 舊志列 循績

蘇頌字子容紳子登慶歷二年進士第知江寧建業承李氏後稅賦無藝每發斂高

下出吏手頌因治訊他事互問民鄰里丁產得其詳及定戶籍民自占不實者頌曰汝有某丁某產何不言民皆駭服不敢隱遂剔蠹成賦簡而易行諸令視以爲法至領其民拜庭下以謝民有忿爭諭以鄉黨宜親善往往謝去或半途思其言而止調南京留守歐陽修委以政日子容處事精密一經閱覽吾可無省矣時杜衍老居睢陽見頌深器之曰如君直所謂不可得而親疎者皇祐五年召試館閣校勘同知太常禮院議立郭皇后神御殿事謂郭后無可廢之罪仁宗有不當廢之悔宜耐郭后於后廟而加一懷哀愍之諡庶不爲逼曾公亮深歎服之遷集賢校理富弼與韓琦爲相同表其廉退知潁州仁宗山陵調發倉猝爲度土產有無高估緩期官自爲市民不知擾而課最他郡潁人德之通判趙志忠本邊徼降者頌待以禮志忠感泣曰平生誠服惟公與韓魏公耳歷擢知制誥判審刑院有知金州張仲宣坐枉法賊論死法官援例杖黥頌奏免之改流海外遂爲定例進銀臺司知審刑院時王安石用事以李定爲御史宋敏求知制課封還詞頭復下頌當制頌報奏不具草次至李大臨亦封還於是並落知制誥歸工部郎中班時稱熙寧三舍人歲餘出知婺州方泝桐廬江水暴迅舟橫欲覆母在舟中幾溺矣頌

同安縣志

卷之二十八

人物錄 鄉賢三

哀號祈籲舟忽自正母甫及岸舟乃覆人以純孝所感徙亳州加集賢學士知應天府呂惠卿嘗語人日子容吾鄉先進苟一詣我執政可得也頌聞微哂而已凡更三赦大臨還侍從頌僅授秘書監知通進銀臺司吳越飢選知杭州有百餘人遮道訴轉運司責逋市易緡錢晝繫公庭夜禁廂院死無可償頌曰吾今釋汝使汝營生期以歲月衣食之餘悉以償官可乎皆曰不敢負於是盡縱之去轉運使怒欲奏頌沮法而縱者乃先期還逋遂不敢言一日宴于郡治堂聞將兵給集謀害官吏郡人喧傳不安頌談笑自如密諭捕爲首者械送獄中迨夜會散而坐客不知也召修仁宗英宗兩朝正史轉右諫議大夫使契丹遇冬至其國歷後宋曆一日北人問孰爲是頌曰曆家算術小異遲速不同如亥時節氣交猶是今夕若踰數刻則屬子時爲明日矣或先或後各從其方可也北人以爲然使還以奏神宗喜曰卿所對殊善因問其山川形勝人情嚮背對曰彼講和日久頗竊中國典章禮義以維持其政上下相安未有離貳之意昔漢武帝自謂高皇帝遺朕平城之憂雖久勤征討而匈奴終不服至宣帝呼韓邪單于稽首稱藩唐自中葉以後河湟陷于吐蕃憲宗慨然有收復意至宣宗時迺以三關七州歸于有司繇此觀

之外國叛服不常不繫中國之盛衰也頌意蓋有所諷神宗然之元豐初權知開封府尋貶秘書監知濠州皆以治獄事被譖罷郡未幾知河陽改知滄州入辭帝曰朕知卿久然每欲用輒爲事奪命也夫卿直道久而自明頌頓首謝召判尙書吏部兼詳定官制因陞對神宗謂曰契丹通好八十餘年盟誓聘使禮幣儀式欲修一書俾有可據非卿不可書成喜賜名魯衛信錄元祐初遷至吏部尙書兼侍讀奏謂人主聰明不可偏有所嚮惟應以無心則無不治每進讀至弭兵息民必援引古今以動人主之意既又請別製渾儀因命頌提舉頌既遂於律曆以吏部令史韓公廉曉算術有巧思奏用之授以古法爲臺三層上設渾儀中設渾象下設司辰貫以一機激水轉輪不假人力時至刻臨則司辰出指星辰躔度所次占候測驗不差晷刻晝夜晦明皆可推見前此未有也遷翰林學士承旨五年擢尙書左丞七年拜右僕射兼中書門下侍郎賈易除知蘇州頌言易在御史名敢言既爲監司矣今因赦令反下遷爲州不可爭論未決諫官楊畏來之邵論其稽留詔命頌遂上章辭位罷爲觀文殿大學士集禧觀使繼出知揚州徙河南辭不行告老以中太乙宮使居京口紹聖四年拜太子少師致仕方頌執政時哲宗年幼

同安縣志

卷之二十八

人物錄 鄉賢四

諸大臣紛紛常曰君長誰任其咎每大臣奏事但取決宣仁后哲宗有言或無對者惟頌奏宣仁后必再稟哲宗有宣諭必告諸臣以聽聖語及貶元祐故臣御史周秩劾頌哲宗曰頌知君臣之義無輕議此老徽宗立進太子太保累爵趙郡公卒年八十二詔輟朝二日贈司空理宗朝賜諡正簡頌爲相時務使百官守職量能授任杜僥倖之原戒疆場之臣邀功生事議有未妥者毅然力爭之故當母后垂簾之秋能使元祐之治比隆嘉祐器局宏遠不與人校短長以禮法自持雖貴崇奉養如寒士自書契以來經史九流百家之說至於圖緯律呂星官算法山經本草無所不通工筆札其蹟雜見鳳墅續法帖中尤明典故朝廷有制作必取正焉蘇轍謂曰子容博學強識其講說放失舊聞多得詳實嘗議學校欲博士分經課試諸生以行藝爲升俊之路議貢舉欲先行實而後文藝去彌封臆錄之法使有司參考其素行必自州縣始庶幾復鄉舉里選之遺論者韙之

志書史會要

舊志參閩書宋史江南浙江通

石亘字彥明廣從弟嘉祐八年進士累遷司農寺幹當公事熙寧中淮浙江東饑從司農卿張諤賑濟所過盡發官府庫置場給散又募收養遺棄小兒所全百餘萬

有司劾其不循常法與謬俱罷巨曰使事有指將以施實惠於民也若以法繩之敢逃罪終陝西運屬嘗編漢唐名臣奏議五十卷自爲文集十卷祀鄉賢舊列循績

吳燧字茂新紹定二年進士教授福州改知漳州賊寇竊發設方略扼要害屬縣以安累遷監察御史上疏以正紀綱開言路爲第一義冬雷復論鄭清之爲執政弗畏天災宜俾奉册就第用宦官宮妾不知名者代之疏入除大理寺卿不拜而去再歲調爲秘書監入對願絕內降裁私恩聚忠賢抑嬖倖節不給之費去不良之牧擢殿中侍御史兼侍講時盛夏猶寒燧言宜崇陽抑陰洪天賜論董宋臣等甚力燧請行其言改禮部侍郎未幾奉祠度宗立召爲兵部侍郎卒燧彈劾數十卷皆通達國體義形於色薦書數十人盡知名士祀鄉賢

陳綱字舉正父元愷善屬文終龔邱令綱淳化三年進士爲建州觀察推官故事歲春夏率丁夫數萬採茶綱入奏請以北苑茶供御餘皆賦民收其租入在民者官復定其直償之則民不困而國亦利詔如其請建民德之累官淮南江浙荆湖制置發運使祀鄉賢弟統統子昌侯俱進士通志舊列循績

宋宜天聖八年進士以便親簽判本州治平中除太常少卿熙寧初知漳州宜有文

同安縣志 卷之二十八 人物錄 鄉賢五

行爲州里所推及卒朝廷遣人禮葬元祐中劉康夫作修學記稱其行事全乎人

理舊志列循績

顏五郎賢聚人神宗朝任柳州同知有治聲金門志

石賡字聲叔皇祐元年進士累遷大理寺丞王安石奇其文薦之以議新法不合遷

審官院旋外補歷湖南提點刑獄廣西轉運判官賡子元教爲泉州長史悉貲市

書以田畀浮屠氏其後六子皆入仕爲甲族從弟巨再從姪孫起宗舊志參閱書

石元宋時爲國子監助教生六子皆仕爲甲族時有長子令黃仲英家邑東其後炳

爲職方郎中有東黃西石之號舊志

林棐字彥忱元豐八年進士嘗判沂州以行河勞賞驟遷郡守部使者擢大府少卿

有詩文行于世舊志

劉達字公達元豐八年舉進士第二人調越州觀察推官累官同知樞密院事中書侍郎崇寧五年正月徽宗以星變避殿減膳達請碎元祐黨人碑寬上書邪籍禁帝從之夜半遣黃門至廟堂毀石印翼日蔡京見之厲聲曰石可毀名不可滅也二月京免相達與趙挺之同心輔政盡更張京所行事進用元祐黨人子弟後京

令其黨復申紹述之說鄭居中言陛下所建立乃厚下裕民何致天譴輒更張耶
帝遲疑達於是京黨論達專恣反覆引用邪類出知亳州京復相再謫鎮江節度
副使安州民往京復罷起知杭州後召至都卒贈光祿大夫祀鄉賢

呂大奎贊曰崇寧之初耿耿孤忠政尙元祐弊革熙豐國事一新公其彌縫千載垂
休斯文有功書

謝圖南才兼文武舉嘉熙間累官瓊州安撫使封開國男食邑同安八閩通志

郭巖隱字石菴靖康二年由明經舉孝廉任都轉運使歷粵東節度使朱子簿同時
式其廬卒爲葬崧山巖下題其墓曰安樂窩舊志

劉孟虎字質甫紹熙四年進士有敷歷之才歷廣東運司主管文字從臣交薦入爲
太學錄遷博士宗正寺簿終通判興化軍閩書參隆慶志

王南一號桂軒紹定間擢兩科第以國子博士知漳州洪天錫扁其坊曰兩科太守
舊志

曾秘字泰之與朱文公友善乾道五年進士薦授國子監丞知惠州時盜賊蜂起道
路不通秘捐俸繕亭驛增冷泉叱馭秀麗等庵設兵防守以便行者後知漳州惠

同安縣志

卷之二十八

人物錄 鄉賢 六

民遮留終朝奉大夫卒祀鄉賢

許衍字平子慷慨喜言事紹興二年以太學生伏闕上書士論黷之乾道八年上舍
登第嘗進本論二十篇言四民利害及上供銀攬戶之弊朱子與書謂其仁人之
心未嘗忘天下之憂條究汀漳泉經界甚悉通判建寧府未赴卒祀鄉賢子伯詡
以蔭入官知仙游縣終福州府通判書

薛舜俞字欽父紹熙元年進士教授南劍州未上三府交薦差江西漕司幹官堂審
除吏部架閣以言者罷後起江東常平幹官與其長李道傳賑荒多所全活改知
金華縣守督宿逋苛峻舜俞引誼力爭寬期示信民悉樂輸罷歸卒舜俞問學淹
貫議論磊落挾負才氣仕數齟齬里居授門人多通顯著有文集及易抄詩書指
三百餘卷祀鄉賢

薛舜庸字惠父舜俞弟紹熙四年進士調龍溪尉改分寧丞嘉定間知古田縣民間
牛死例輸錢於官舜庸嘆曰民不幸喪牛又責入錢是重困也立命除之增廩餼
建閣藏書以惠生徒通判興化軍未上卒

吳子斌字伯全少游上庠有文名嘉泰二年進士知南豐縣有惠政秩滿民詣臺借

留者千計通判肇慶府卒於官祀鄉賢

許巨川字揚甫學得伊洛之傳嘉定七年進士歷廣州建康教授篤意訓誨成就甚衆士祠之學改秩知東莞縣捐橐金新學宮給沒官田一頃八十三畝歸學贍士儲錢十萬爲異日修治費邑務雖煩常與諸生講解至其拊摩軫切催科數負殿中書劉克莊時爲計使閱其斷訟以爲仁明兼至莞民亦建祠祀焉主管治司辟守象州祀鄉賢

閩書廣東通志

許伯詡字子揚以父衍蔭官嘉定九年轉承事郎知仙游縣政多慈愛有便民錄數十餘條終福州通判

閩書

柯南起字時泰號覽山積善坂尾人少有英略狀貌魁梧宋元革命民不聊生公保障密山全活萬人宋祚終以人材薦授同安令繼而尤臺平章征南饋餉不絕陞泉州路治中左遷龍溪縣尹改授忠翊校尉知漳浦縣招撫流亡治有成績復授南劍路將樂縣尹兼勸農事蒞任五年尋謝歸杜門不出

以上舊列循績

元

郭可大字行之後倉人少力學博通經史元英宗至治癸卯科進士任本省副使順

同安縣志

卷之二十八

人物錄 鄉賢七

帝至正元年致仕榮職歸家年七十卒泉屬終元之世登進士第惟可大與惠安

盧琦兩人而已

郭有家族譜

明

林希元字茂貞號次崖正德丙子丁丑聯第進士授南京大理寺評事世廟登極條上新政八要曰務正學親正人用舊臣清言路急交修持久大息中官機務以拔禍根罷中官鎮守以厚邦本又言臺諫諸臣默默於往時曉曉於今日竽瑟混聽菲葑奚採宜考覈以清言路進士周祚等疏言近來章奏紛紜無如希元所陳者乞留神省覽見之施行下所司議議上帝優詔嘉納焉遷寺正是時希元名動兩都忌者側目會以議獄事忤寺卿陳琳南京御史戚雄等疏論之降泗州判官泗饑辦賑周詳青陽滄湖嘯聚九百人單車往諭皆解散且請貸其罪而賑恤之境內以安復以不屈當路棄官歸大臣交疏薦之再起寺正擢廣東按察僉事管鹽屯二政條奏切近四款復以行於泗州者爲荒政叢言上之帝可其奏通行天下尋改提督學校其條訓多士務在闡釋經傳敦崇古典劇寇王畿剽掠廣惠希元署按察篆率府衛兵指授方略即時討平御賜白金陞南京大理寺丞上王政疏

爲目二十有一秩滿留內時遼東軍陵辱撫臣希元抗疏極言姑息之弊忤旨謫
欽州知州壤接安南城郭官舍半鞠墟莽悉心經畫之開誠先物約身裕用塞弊
竇興廢墜遷學育才廣置勸農之吏設立屯田增修營堡一意教養捍衛會有征
安南之命希元熟究其國中虛實強弱人情向背慨然以興復爲己任疏六上而
奉命大臣圖安靖第受其納款請罪希元之說不行陞海北道兼管兵備珠池朱
崖軍民疲困珠盜橫行立條嚴禁一年而民蘇盜息卒坐安南用兵事與督臣異
議以拾遺罷歸欽人建祠生祀之希元慷慨鯁直有俯視流俗擔當宇宙之氣而
才識亦練達世廟罷鎮守中官悉歸內監自其一疏啟之而安南歸命還四峒亦
希元之議足以奪其魄焉家居手不釋卷晚年益究義理精微之極參訂諸儒所
定致知格物之說附以己見曰更正大學經傳定本所著易經四書存疑皆足羽
翼朱子學者師之又有次崖文集祀鄉賢又建專祠特祀於文廟之右

楊逢春字仁甫號西渠少有志氣每論爲人爲學輒以第一流自期嘉靖乙酉舉人
己丑進士授仁利令未任丁外艱復補崑山令銳意任事賦籍獄牒胥吏不得竄
手縣號富饒而一毫不染吳俗大戶領京運邑令寄書權貴金縑禮物皆大戶爲

同安縣志

卷之二十八

人物錄 鄉賢八

備逢春獨裁罷之民以此感逢春最深縣賦稅繁且重民力不能給者逢春不忍
急之行取至部以錢糧不及緩三年乃得南京浙江道御史骨鯁獨持痛惡依阿
渙恣之習遂抗疏列論兩京九卿大臣之脂韋者十餘人劾退挾賂奔競之濫拜
官僚者一時風采凜然又陳江北屯田利弊知無不爲巡視江南倉汰黜貪庸風
采振竦擢廣東僉事備兵嶺南疆界遐曠猺獞蕃育將玩卒惰賊白日剽行旅逢
春首責郡縣修政息民易將選卒指授方略賊發輒得夜門不閉事無畏難諸所
剔蠹甦民雖不屬己亦毅然任之丁內艱復補四川僉事專管鹽屯利源所在豪
右猾吏穴之爲綜刷成額按籍考要僞巧無所飾課入日進時叙州戎縣都蠻叛
肆行殺掠邊無居人逢春獨抗言禦取之策撫按會檄委辦度險阨分兵進剿陽
撫其四鄉以剿二鄉爲師名果得四鄉最傑者四十人以來盡殲之用是兵入有
功俘斬千計擢湖廣參議分部潭邵之間平賦分役節冗興教凡所當爲悉力從
之縱有犯忤不恤也性孝友與其弟不立私財居鄉敬老字幼不以貴倨鄉人慕
悅陞雲南按察副使未上而卒於湖南民走哭相踵不絕喪歸罷市舉聲以過出
境乃止王慎中爲銘其墓祀鄉賢

傅鎮字國鼎嘉靖戊子舉人壬辰進士由行人授南京御史疏諫聖駕無數幸山陵
帝嘉納之有守璫潘真挾私亂政陵虐軍士鎮言真不當以嬖倖開利竇殘朝廷
赤子請按真姦賊果有左驗逮治之已念母病請歸旋補廣東道御史歲辛丑北
兵大掠三晉以西地總督樊繼祖第與諸將帥堅壁自衛而先後報首功至五百
餘級鎮疏其欺罔盛張功伐實未嘗與敵戰也勘果如其言繼祖職武定侯郭
勳獄事下錦衣孫綱推問受賂絳何英等以脫勳罪有旨覆治鎮坐勳及勳綱交
私罪餘分別寬貸之出按雲南會母卒服除補職巡真定又巡山東屬妖人謝漢
商大常作亂擒獲黨與甚多郡縣概具獄磔鎮論殺首惡餘脅從者三十餘人悉
放去入署河南道掌計事嚴嵩欲黜觀察使一人鎮不從憾之出爲河南副使有
治河羨金二千餘悉封識之庫中人指其金曰傅真金從鎮名廉之也轉廣西參
政浙江右布政遷湖廣左布政鎮在粵西時有議逐流民者鎮曰彼亦民也况閒
有師儒醫卜商賈之屬可裨我民奈何驅之既轄楚進南右都御史提督操江尋
以病乞歸鎮爲御史凜凜風裁貴戚豪強斂手時目爲傅虎及行法停讞出於仁
恕人多德之敷歷藩臬漸致大位中外倚重焉萬歷中卒賜祭葬祀鄉賢弟鑰

同安縣志

卷之二十八

人物錄 鄉賢九

書

劉存德字至仁號沂東嘉靖丁酉戊戌聯第進士初授行人持節冊祭益府嗣王雅
善修飭自稱勿齋氏存德因宴爲陳四勿之旨王前席罷宴曰昔菑川論三仁今
大行陳四勿足相方矣贈滿百金爲治裝亦值百一無所受獨拜持篆書四幅歸
既報命居三載選浙江道御史會有獻四親廟圖說請祧孝廟者抗疏力諍世宗
震怒擲疏竟以理不可奪得降俸時亢旱章報下震雷大雨如注京師水二尺歡
聲動地羣稱劉御史一言回二天云視兩淮饑籍羨儲十萬請賑貧民得報可兩
淮賴之按應天潘少宰故存德所舉主其子弟殺人匿不出十年存德既至而其
子弟就逮視其獄不可生竟論抵爲書以謝潘出守松江時苦旱六載逋賦至二
百餘萬特設參政督之存德拊循安卹請使者寬期以候秋成是歲大穰使者欲
盡征及額存德又請分三載其後浹歲大熟遂補積逋什之五六值倭寇逼境近
邑婦奔郡城監司恐奸細欲嚴盤詰存德力爭謂稍緩則男婦悉遭擄矣奉使便
道歸省丁外艱服除卽家起知南康府病未赴歲餘稍遷浙江按察副使檄攝嘉
湖諸軍不三日斬首百三十級上功匿不以聞調廣東海道兼諸番市舶利歸藩

司提兵援潮陽諭降劇寇許朝光等八十餘人朝光斬臂誓不復叛以功見嫉被中歸與弟中分產而推其腴事繼母湯藥親嘗爲宗人治產授室喪葬婚娶以次及母妻二族所識貧乏待以舉火者數十家種秫釀酒座客常滿善大書工古文詞其史評制義博士家宗焉隆慶丁卯修志其議論皆闕邑典後多採之病亟自輓有易簣從教華且皖布衿上辨正和斜之句卒年七十一著有結登堂遺稿十卷行世祀鄉賢子夢松夢湖皆進士

洪朝選字汝尹

一作字舜臣

號芳洲更號靜菴嘉靖丁酉舉人辛丑進士除南京戶部主

事出權北新關抽貨算緡度歲課幾何盈額而止津梁不閉任舶上下事竣督放倉儲諸有規畫後人引爲法一日思所學未足非古人學優則仕之意上疏引疾客毘陵僧舍與唐順之講德問業一年始歸又就王慎中上下議論久之充然有得起爲南吏部郎出督學西蜀端士習正文體持法秉公人想望其丰采遷廣東參政調山西歲大祲寇盜充斥多方撫輯殪其元兇破其黨與晉人頌之朝選不爲嚴嵩所善而徐階深與之嚴敗遂以山西參政召入爲太僕少卿尋進僉都御史提督操江疏論盜所由起與所以止盜之方鑿鑿可行留都以靖旋進副都御

同安縣志

卷之二十八

人物錄 鄉賢十

史巡撫山東禔躬以道馭下以法疏陳養民課吏之政甚詳他議驛遞防河皆爲經久計檄所司清差重役繁之弊隨地編差因糧制役巨戶無所規避藩府官校奪民田禁革之悉歸民齊魯肅然隆慶戊辰入爲刑部侍郎伸直臣沈鍊儒臣閻樸寃而正巡撫楊順於理徐階去位張居正秉樞遼王憲爍獄起居正以私憾欲以謀反置之死地除其國屬朝選往勘命方下居正來謁坐定曰貴處傅應嘉謀反今敝省遼王謀反朝選默然出門又曰聞遼王差人入京行賄朝選曰果然當題奏乃疏奏凡楚人入京皆盤詰沿途差兵護送勘事官員及至襄陽撫按道府已勘成招副使施篤臣抱牘請書名朝選曰未提審一人徒據現案成招何須命我公等自成之可也數日施復來見曰遼王府中豎招兵旗反形已露朝選曰果反則我爲興師討罪之大臣不然則勘事之大臣使人往覘之報曰兵圍遼府三匝信息不通王聞法司到無由訴豎旗府內書伸寃二字終日跪伏旗下候命朝選曰此臣子待罪禮也匹夫犯重辟求訴問官尙當審確招詳况親王乎古人有焚梁獄詞者奈何媚權貴傷國家親親意置其事不問亡何施篤臣又謂云大人招要改便改必欲提人按覆審三年亦招不成朝選見羅織已定不得已應曰除

去謀反二字其淫虐貪暴則依前招遂以遼王照戴掄典英事例送發高牆除其國王氏妃給田十頃屋一座養贍終身奏入居正猶以爲左心惡之一時法司同往勘者俱論罷朝選辨本有權臣主使之言居正忿益甚遂以大計劾罷歸會御史劉畏所疏論居正指摘及施篤臣朝選曰令我聽指使誣以反劉疏及我矣居正聞益恚謂朝選不死且與劉犄角我也又當居正奪情時進士鄒元標翰林吳中行疏列其不孝狀削籍遠戍朝選曾移書壯之稱其文章節義爲居正所跡憾益深不可解于是密使私人授旨於閩中諸當事或起之田閒或啗以大位或懼以顯禍冀結其欲而速其謀有知其冤不肯從者有身受其薦不忍從者朝選性剛介不能容人過失里中不平事狷激言之有宦家子摸捏朝選手板撫有司短長言於當道朝選不知也時左布政勞堪以支放邊戍月餉搭新鑄錢失軍心巡撫耿定向檄止之語頗侵堪適耿招朝選講學每咨以時政堪疑朝選實中之耿以憂去勞代之遂希居正意乘是藉快已憤陰遣邑令金枝日夜捆撫其無情事以報勞得之大喜以聞於朝居正從中擬旨削籍逮訊堪得密報遂馳戎卒逮朝選下臬獄不二日斃之獄中且謂朝選在川中得回生藥暴尸四五日不得出尸

同安縣志

卷之二十八

人物錄 鄉賢十一

蟲至出戶朝選居官廉潔以名節自砥礪生平有學行政事之稱致身卿貳而家故貧嘗有詩云負郭原無半頃腴山田新買百升餘里人莫笑清貧甚欲學周黃恐不如林居十年許一旦嬰奇禍以死士大夫無不扼腕冤之者子兢訟冤闕下居正矯旨杖八十仍奪蔭其夏居正暴卒都諫李廷儀條其冤狀朝議堪回籍繼奪職甲申兢再訟父冤有旨下堪獄戍定海未幾詔復朝選官兢補蔭如故一時阿堪意鍛獄及造謗者俱相繼竄逐朝論猶以堪不正典刑未快人心云朝選善爲文所作有氣岸類其人著有芳洲摘稿歸田稿續歸田稿祀鄉賢

參詞林人物考

陳道基字以中號我度徙晉江嘉靖己酉庚戌聯第進士授浙江嘉善知縣廉約明恕吏民畏懷以卓異徵聞母訃奔歸復除雲南道監察御史巡按廣西時邊徼諸吏類多闖茸下車按其尤無良者墨吏望風解綬去行部詢民疾苦銳爲興革尤加意造士復按廣東柘林兵叛流劫會省城門盡閉商民數千萬委堞下道基嚴兵陳郊坐城郭納入之振飭風稜郡邑應聲凜雪諸所指注咸足貽方來畫一以積望擢太僕寺少卿尋移南鴻臚卿爲讒者所中出爲四川副使遷廣西參政拊循益力屬邑告變察其故罷培克令拱悍尉各一人諸巢遂戢城西南河流舊故

橫溢爲築橫橋而束之與灘江會公私交賴再遷浙江按察使起拜南京都察院右僉都御史提督操江卽歲改應天巡撫時高拱復相修徐階宿憾意曩道基外調時徐階尸之必將快意於階藉手爲釋憾地而道基禮階益恭吳中巨室爲猾少持無寧日道基檄下所司諸告密株連者置勿問溧陽史氏有奴誣主者下奴獄論死自是告訐之風頓息吳中人謹若更生言官吳某復揣柄臣微指誣摘其短卽日解組行歸遭外艱讀禮鍵戶廷議用宿望起巡撫順天閱部伍除戎器覈幕府市租爲饗士費拂大帥意張相居正以歸葬故往還良涿閒督臣躬迓道左道基獨臨邊自如遷南大理寺卿進南戶部右侍郎總督糧儲尋以工部右侍郎召入督陵工遷南刑部尙書有孝廉與序班鬪都市前司寇奏當得旨矣吳歛二相力爲地道基持不動於是言官復疏其短再疏乞歸竟得請道基長身玉立廣額豐顙性抗挺自負一中讒戎再被謗書不以其故少貶嘗曰我道固是耳家居敷門寡接人弗敢以私干而獨篤故舊崇長厚旣爲列卿見鄉先達逡巡隅坐其接後進必與鈞禮歷官不攜家室不置妾媵晚歲復寢一室左圖右史布衾縑幃蕭然寒素喜談星命堪輿多奇中年七十五卒撫按以聞於朝賜祭葬祀鄉賢

同安縣志

卷之二十八

人物錄 鄉賢 十二

書廣東廣西通志

李獻可字堯俞號松汀隆慶丁卯舉人萬歷癸未進士初授武昌府推官疏滯雪抑讞獄得情上官事有不決屬之輒刃解臬掾有犯法者臬囑寬之不從徵入戶科給事中會潞王之國疏請諭制在國無以縱敗禮在途毋以擾困民太后聞大怒請加譴帝特全之越日讌宮中疏自袖墜顧近侍曰此李某疏勿失也他如請內帑以賑饑謹決章奏以防壅蔽伸法紀以全安攘所條陳悉中窾轉禮科右刑科左主試山西時慶得士值京考以莊慎輔鑑裁物情翕如陞禮部都給事拜官甫三日上皇太子出閣講學疏言册立之典可稍緩而待來年諭教之典不可停而虛今日皇長子今年十一歲去古人八歲始學之時已踰其三宜及今春孟特令禮卿酌定儀注擇吉施行至於輔導尤宜選孝悌博聞有道術者爲之何必委巷伯之倫而秘之房闈之內哉疏入有旨謫外元輔王家屏力救封還內降至於再三帝怒甚削籍罷歸家屏亦遂致相事獻可抵家日以詩史自娛事繼母孝撫季弟甚篤悉予先貲構廬居之誘誨款至人不知其爲異母也溫謹謙遜與人交情至於文不以所長掩人不言人過有善吹揚如不及起家二十年田宅僅中人產

蔡守愚字體言號發吾涪州人萬歷乙酉丙戌聯第進士授南儀制司主事迎母就養暇與同舍諸名公證彙古今所得益深詩文日進丁內艱歸襄事畢探撫前言往行有裨風教者彙爲明倫寶鑑一書後除工部屯田司主事督理易州龍灣二廠舊時炭直不早給而惜薪司復從中索例不得以時納甚且以不如式駁還大爲商病則爲移內外主者與訂約時其出納給直令商自兌不經他手凡日用薪蔬例供概從減省曰毋令有餘以爲市又興二廠社學躬往課督時內官四出採礦守愚曰民方上供炭課倘被流散誰執其咎且近京師安得有礦將抗疏諍事遂寢擢虞衡司員外遷屯田郎中去日諸商環擁車爲之梘守愚曰有二社學在令子弟勿廢業吾棠不翦矣是時方急殿工物力告誦力贊大司空疏借內帑以郡國贖輸補償之得報命陞四川副使分巡上川土酋肆掠播州尤甚以兵備討平之帝嘉其功改播爲遵義晉參政整飭威茂擢按察司陞右布政皆分道川南會六詔不靖中丞喬公薦守愚以原官移節建昌建地延袤三千餘里五衛八所棊置于狝獮番棘間蝥聚烏散剽掠多年守愚先後巡川南最久時土婦瞿繼良

同安縣志

卷之二十八

人物錄 鄉賢 十三

與其叔馬應龍爭印仇殺授計游擊吳文傑直入其臥內持印而出嫂叔投戈聽命蘭州土婦奢氏爭權留印惡目簸弄其間檄往會勘議獻首惡及追印爲先如印不可得則疏請更鑄至首惡惟縛獻目把餘不足問議乃定揚酋陷棊江帝命總督李霖寰徂征守愚以畫策督餉功賜白鏹採木役興在川南則條無木之難無錢糧之難并陳諸難易情形甚悉在建則條募夫採木出水三難又請司帑先給三分之一而以建昌之杉易重慶之楠兩地交便威茂餉米三萬餘藩司給直灌縣買運不時積欠無稽爲條包攬塘塞乾銷私兌那新補舊諸弊竇立三限掛銷獎戒法分派新繁崇寧郫彭產米諸邑店戶買米不齊驗糧官督之脚戶運米不到監收官督之其久逋者量追米脚價給軍自是威茂無滯餉其徙建昌則寄孥雅州單車泣焉忽獮從山谷突出衆驚竄守愚端坐不動獮至曰此菩薩也相率禮拜去至則宣布恩威申明約束番夷戢服復爲畫善後諸策改將增兵俾嚴戍守爲建南計安備殫心力先後擒斬惡夷七百餘追還被擄男婦五百餘以積勞成疾乞休者三而兩臺苦留之遷雲南左布政候代會大帥侯某移鎮越巂欲計擒黠酋烏撒以爲功亟馳止之曰是未可輕也彼巢據官道而力能號召執之

必啟衅既別去而帥決計誅之自是酋孽奮呼諸夷響應道路梗塞踰旬守愚聞報失聲曰不聽吾言噬臍何及爲撫諭熟夷檄將召兵然後利濟鎮西之間享無事焉其威惠素孚也未幾得代致仕而直指彭某竟用流言以考功法中之蓋自建南被禍士民日請大征而當事日議鵬剿然三尺孤懸兵餉難處惟守愚謂宜繕儲胥討軍實以防與撫爲持久計所以安建者在此而得咎亦由此初土官安世隆爲那固所弑孽婦祿氏糾夷報復藉口夫亡妻繼求管事而陰欲嗣姪祿所奸弁奸生有居爲奇貨者守愚責以大義俾逐祈而立安世業然後許之烏思藏之貢者不無生事內地臺使題參部覆議革而各番求復不已守愚謂貢額國初已定彼賣勅之利孰與貢賞之所獲厚川省三萬茶引亦惟貢番貿易通行今關門一閉無論茶法爲沮卽軍需且歲增數萬竟如其言復之于是諸番願世世奉款而肖守愚像于宏化寺中嘗署藩篆一月籍羨金千餘無所取吏白以例且曰如後來者何笑曰我自有羨後人自無兩不相妨其廉不近名如此生平學術行誼一遵程朱爲人樂易質直無媿媿態以故特立寡援至家掃軌讀書絕迹城市扁所居軒曰寧澹客至尊酒盤飧不爲厚具曰惟澹可久戒諸子曰得不得命也

同安縣志

卷之二十八

人物錄 鄉賢 十四

非分之有不必過求爲詩有魏唐風味文出入經史具載百一齋稿中年七十卒

祀鄉賢

閩書通志
清白堂簡

蔡復一字敬夫號元履用明子萬歷甲午乙未年十九聯捷進士給假歸娶授刑部主事歷員外郎有所平反多出其判丁兩艱服除補兵部車駕遷武庫郎中每陳籌邊事宜司馬探以入告久之遷湖廣參政分守荆岳清積逋覈虛冒革加派足軍精嚴保甲禁驛騷杜參謁壬子癸丑兩驟江漲堤蕩盡決極力賑恤時三道並缺奉檄兼署辰沅諸郡多積逋兵乏餉三年呼癸脫巾在途檄諭之兵素服其威信諫始輯亡何鎮筮諸營復沸嚴諭不歸營不給餉比聽命乃措給之參戎請調苗兵千人制之不從曰豈有借苗兵殺民兵之理徐按首禍七人正法鴟張始息進按察使大小五冲苦苗患攝兵備篆十月三度報捷復築邊墻七十餘里又黑苗屯鎮遠遍橋間官道爲梗出牛酒令兵民誓相應援道始通會黔撫有大征紅苗之議檄永順保靖二土司助蜀土司攻之復一云狃苗禍專在黔黑苗害楚淺而害黔深紅苗毒蜀蜀宜角之今黔代蜀憂不以黔徇而逼楚徇之毫衆葛耕烏能保以鄉鄰逞纓冠之鬪大拂黔撫意遂引疾歸時已推河南布政楚人請以加

秩留原任旨報可而復一堅辭回家囊中如洗抵里猶未有居光宗卽位起備兵
易州遼陽報陷出俸金募鄉壯修器械爲備而京中諸貴人遣妻子避難乘傳絡
繹不絕下檄非奉廷遣悉裁其符銜者疏誣其聞變涕泣復一上章自理且揭云
請以兵加頸誰先皺眉請同過三岔河誰先縮足又云必書帕關說之外方有真
人品言者大慚擢山西左布政以病告爲納言所格南返聞西江復陷歎曰茲豈
臣子養高日哉力疾之晉時邊精緊急加派難堪上蠲增餉抵京運二疏格不行
又于逋者裁其浮征勉以正額民爲樂輸宗祿邊儲原緘給發在任凡七閱月天
啟二年以右副都御史撫治鄖陽益勵清白歲大旱步行祈禱自狀其罪布衣素
冠自繫於獄是夕遂大雨寮屬士庶迎之乃還鄖賦萬金加額至四萬有餘復有
舊逋七萬餘疏請免之覈屯額肅軍實飭吏懷民種種畢舉三省視爲領袖奢崇
明安邦彥反貴州巡撫王三善敗沒進復一兵部右侍郎代之喪亡之餘兵食盡
絀斗米銀八錢復一勞來拊循人心乃定尋代楊述申總督貴州雲南湖廣軍務
兼巡撫貴州賜上方劍便宜從事節制五省復一乃召集將吏申嚴紀律遣總理
魯欽等救凱里斬賊將五百餘賊圍普定梟賊間陳其愚以殉遣參將尹仲副使

同安縣志

卷之二十八

人物錄 鄉賢 十五

楊世賞等合擊之邦彥負傷而逃遂搗其巢斬首千二百給發兵通盤江路斬逆
酋沙國珍及從賊五百已大破賊汪家冲斬首二千欽等復破賊汪家冲蔣義寨
斬首二千二百長驅織金織金者邦彥巢也緣道皆重關疊隘木石塞山徑將士
用巨斧開之或攀藤穿竇而入賊戰敗遁深箐斬首復千級窮搜不得邦彥乃班
師是役也焚賊巢數十里獲牛馬甲仗無算復一以鄰境不協討致賊未滅請飭
四川出兵遵義畢節抵水西雲南出兵霑益抵烏撒犄角平賊帝悉可之因命廣
西雲南四川諸郡鄰貴州者悉聽復一節制六疏請益餉未下而施州遵義兵萬
餘始至衆議因銳渡河復一戒勿深入令渡河六十里筍谷里驛酌進止乃兵甫
渡河而施兵先逃二千餘魯欽謂師退必散不如直搗其穴遂徑趨水西遇賊數
萬力戰破之斬馘千餘次日霧賊來襲戰卻之是晚施兵先潰賊從後襲擊諸營
盡潰死者數千人時復一爲總督而朱燮元亦以尙書督四川湖廣陝西諸軍以
故復一節制不行於境外欽等深入四川雲南兵皆不至復一自劾因論事權不
專故敗巡撫御史傅宗龍亦以爲言廷議移燮元督河道令復一專督五路師御
史楊維垣獨言燮元不可易請令兼復一任帝用維垣言解復一任聽勘而以王

城爲右僉都御史代撫貴州復一俟代仍拮据兵事與宗龍計劃破烏粟螺蝦長田及兩江十五砦叛苗斬七百餘級賊黨安效良首助邦彥陷霑益雲南巡撫沈儆劾遣兵討之未定遷侍郎去代者閔洪學招撫之亦未定及是見雲南出師懼約邦彥犯曲靖尋旬復一遣許成名往援賊望風遁長田苗酋天保阿賈約水西賊欲斷平越餉道復一在病中曰一息尙存豈可以賊貽君父憂檄諸將分路進剿遣劉超等生擒保賈殲賊首五十餘名破百七十四砦斬級二千三百五十有奇平越人謂入三百年不到之地成二百年未有之功而西賊失一大臂矣捷報正患瘡痍扶病至平越愈劇猶上捐俸助工疏十月卒於平越軍中訃聞帝嘉其忠勤贈兵部尙書賜葬諡清憲蔭一子官廷議欲諡以忠不果避魏璫名也復一學博才高下筆千言兼工四六他諸著作皆崇論宏議涵古茹今至書牘奏議之文慷慨談天下事切劘豪貴披吐肝胆而詩則出入漢魏唐宋閒居然一代名作生平耿介負大節有志聖賢之學經濟文章特其緒餘人比之張襄惠嘗自易州貽何喬遠書曰宮事則客媼與魏闔相表裏朝事則牛李構鬪疆事則經撫矛盾而戰守無穩著此三憂也淮南憚汲黯江左有夷吾將誰望之後皆如其言其餘

同安縣志

卷之二十八

人物錄 鄉賢 十六

論遼事有五未解論銓政有四疑論時事有三無四多論大學歸於物我一本論克己謂惟克己乃由己又云某生平服膺三言報國恩以忠心擔國事以實心持國論以平心又云某惟學正己不求四字耳所著有遯菴全集特祀鄉賢

舊志

張廷拱字尙宰號輔吾萬歷丁酉舉人辛丑進士授懷寧令清內使挾帶私船寬省運民夫丁艱服除補豐城捐俸築堤以利民改遷安編鋪平法遼左車馬不疲奔命天啟中歷祠祭司郎中時朝中多依附權璫獨廷拱正言讜論非端人君子不與交游削籍歸莊烈帝卽位求舊賜環以邊才擢僉都御史巡撫大同召對稱旨帝顧近輔曰廷拱福將也至則給宗祿恤飢軍修土堡制火器邊計靡弗周密警告猝至禦變投機賊不能犯以焦勞成疾及亟諄諄誠諭諸將竭力報國言不及私卒年六十五賜祭葬諡襄靖祀鄉賢

林一柱字廷郢號樸所啟元孫萬歷丙午舉人庚戌進士初理揚州薦糾綜覈輿情允洽治獄多平反不輕鞭朴歷署三篆皆有廉名試湖廣御史疏奏切直請臨朝正紀綱有六逆五盡二反一順之目海內傳之熹宗初年疏數上歷陳賣士餉卒名存實亡之弊雪幽忠明功罪至有世運當阨舉國若狂之句留都東宮火請復

建文廟號劾織造監李實制官虐民必亂天下闒黨側目因請告例轉廣東參政拂袖歸居家以孝友稱及再召而一柱已卒祀鄉賢

林鈺字實甫龍溪籍萬歷壬子舉人丙辰進士殿試一甲第三人授翰林院編修歷國子監司業遷祭酒監有銅鼎銅缸爲臨雍會食及貯水備火之器魏璫欲假鑄錢鈺持不與時璫擅權烜赫立祠幾遍天下一日諸生執呈至鈺問云何對曰魏公功德巍巍宜立像太學請定判鈺曰諸生宜熟思之孔聖嚴師也禮有人主北面之尊魏人臣也若並列座他日皇上入學謁奠君拜於下臣偃於上能安之乎明日遂稱病去莊烈帝卽位聞之歎曰危行言孫君子也召復原官晉禮部侍郎兼侍讀學士七年以枚卜召對陳用人理財靖寇寧邊四策卽日拜東關大學士入閣辦事時帝方疾黨人以鈺誠懇不立門戶特加眷顧首輔忌之困以煩劇遂以勞疾卒於官謚文穆鈺冲淡和平廉介自守鄭芝龍受撫奉千金爲壽卻之復其書曰成人之美君子也因之以爲利非君子也芝龍亦爲歎服以上舊志列名臣

彭用乾會心正學耕讀教授洪武十四年令方子中以孝弟力田薦授臨朐丞復除光息調徐聞有惠政擢知其縣清苦不以家累自隨卒官年二十九其甥負骨歸

同安縣志

卷之二十八

人物錄 鄉賢 十七

葬焉

閩書以下舊列循績

陳福山洪武癸酉甲戌聯第進士令零陵奏蠲無徵稅千餘石永樂丙戌較文廣東

丁亥徵入纂修大典後改江山縣訓導陞瀧水教諭閩書

林賢生字朝垣永樂十八年舉賢良方正赴京以鹽戶單丁陳情詔授程鄉知縣縣人謠曰林公如虎軍民安堵與巡按相左告歸結廬斗拱巖與友人葉文勘窮孔

釋號隱谿松叟

閩書參舊志

黃廣字文溥建文壬午以貢入太學永樂間歷知德慶州署肇慶府事興學校均徭賦招逃亡減鹽鈔民賴其惠雖強梗猾人亦聽撫遂延名儒修郡志上官嘉獎士民祀之名宦家居爲本邑奏除荒田歲賦五百餘石鄉人德焉沒祀鄉賢閩書廣東通志

德慶州志

葉錄成化戊戌歲貢爲常山開化二縣縣丞在開化興文學除奸豪門廡肅然公退則荷畚蒔蔬編竹爲器身農圃事每食一蔬而已參政方豪者其部內縉紳訪其廨出王瓜青榴及閩中檳榔共延款民號爲一葉側仕終感恩知縣名山藏

葉蕩字仕堯宏治壬子舉人父錄以貢仕感恩知縣蕩令餘干不數月令行禁止無

敢壅惠澤者有監司倨視諸令至蕩改容禮之以艱歸服除補新興令書

楊舜字世柔號可齋翔風里楊江人習法律補邑椽部試異等宏治六年赴選告降得上高典史清白自持苞苴不入邑豪有廖姓橫暴鄉里人發其不法三十事罪至死當道檄舜訊鞠執法不稍貸邑豪伺夜投白金三百求免舜白令發其私令憚避姑召其人還其金又捐一年僱役錢造橋梁以渡行人督賦不受私民無敢逋強盜王宏久為民患捕而戮之民患以除嘗逐林行遇盜知為舜不忍殺在官六年署篆二年俸資外無餘取屢引疾當事賢之不忍舍懇至泣下乃許之正德二年致仕歸途中見一男子為雪凍硬執杖倚石目能視而口不能言舜讓箠至浦城活之始知為漳人為尋其伴而資之是夜忽盜起民各自救夫馬乏人漳人囑其伴自併其担擡舜及代負行裝過浦城嶺而免焉人謂陰鷲之報既抵家絕迹城市遇萬壽飾衣冠望闕拜賀武廟崩製衰服哭臨祠堂盡哀三日建祠宇置祭田率族人以禮祭祀忠孝兩盡可謂一鄉善士矣同邑林希元為之傳探林次崖

集文

張俊正德間以歲貢授徐州訓導持守清潔誨人有方徐士頌之書

同安縣志

卷之二十八

人物錄 鄉賢 十八

蔡煥字爾章號海林以選貢授崑山訓導嘉靖癸卯應天舉人授嘉善教諭癸丑會

試己定元不果副考官袖其文以出大為扼腕陞都察院司務晉戶部郎中出為

臨安知府居官清恬處鄉和睦著有詩文集書 參 舊志

蘇桂字子雲號北峯嘉靖甲申歲貢己丑授淳安訓導銳意作人嘉賢恤貧學者翕

然尊信之與督學不相得致仕歸桂自幼穎悟為文筆下鏗鏘聽者洒洒忘倦十

三歲補邑庠與林次崖黃武峯黃日泉為文會稱為勁敵居鄉飲人以和遇貧乏

多假貸焉邑大夫重其行誼禮致鄉飲大賓年八十卒探林次崖文集

許廷用先以貢生任許州學正由河南籍應試嘉靖庚子辛丑聯捷進士授新喻令

陞南戶部主事居官清白歸囊如洗舊志

黃江字源深號梧圃幼穎慧弱冠為諸生餼焉歷試高等士推為祭酒精於易受經

者屢滿嘉靖辛亥拔貢授增城訓導進諸生質經解疑貧者輒卻其贖日以佐燈

窗費邑令雅重之試士鑰其文屬代評騭一一不爽督學試博士江無不居首署

從化庠與其邑篆托宿巽宮旦夕詣邑視帑獄而已篆不數啟函歸亦不持一錢

從化民為鐫碑誌愛擢樂會教諭教如增城踰年病告歸上官不能留則為給傳

符以優之爲人平易侃直事親孝待二弟友尤嚴飭祀事年七十五卒節清白堂稿

洪兢朝選長子以蔭授都察院檢校伏闕訟父冤賜杖削籍後父冤白復還原官歷

上林苑監右監丞陞貴州通判上疏以苑氏亘古清苦宜節無名之費省徭役之

征苑臣移部知照舊志

楊喬椿萬歷壬午舉人孝友謹厚初令東流矢志清白一夕署中絕糧不欲昏時傳

票鬻米第令家人供麵卽就寢擢守平度州卒于官兩任牧令歸橐蕭然閩書參舊志

蔡懋賢字德甫號恂所萬歷乙酉舉人已丑二甲第五名進士授刑部山西司主事

讀書讀律刻苦自砥無異諸生時處囚一以平恕得情爲主閒有所成獄主者雖

再三持之卒無以易其議也居曹甫兩朞大司寇李漸庵公及吾泉王少宰詹司

寇皆獎重之亡何遘疾不數日卒年僅四十有二懋賢天性孝友一錢之入必與

兄弟共之初第時念父母年高欲圖歸養以神宗方册立東宮冀得一命榮親故

留妻子以代晨昏卽烏紗鷺繡家人俱未獲一面倉猝而卒無一骨肉在旁莫能

詳其居曹狀尤可痛也採清白堂稿

蔣孟育號恬菴入龍溪庠萬歷戊子己丑聯登進士授翰林院庶吉士以終養歸起

同安縣志

卷之二十八

人物錄 鄉賢 十九

補歷國子監祭酒南吏部侍郎孟育古心謙德無貴態操守廉潔始終如一在吏

部時其子履決不能補相視笑曰吾父子何貧也卒以清節著通志參閩書

陳則采號對輝年十二冠童子軍萬歷辛卯舉於鄉初令應城以終養告歸復任揭

陽首敦學校造就人才熊汝霖郭之奇皆所賞拔有惠愛陽人立祠祀焉遷王府

長史不赴卒年六十九舊志

許光卿號賓明祖大來萬州知州光卿萬歷甲午舉人授河南西平教諭陞廣東新

寧知縣蔡清憲贈之曰門風孝弟德宇清純貌無脂縟言必脊倫舊志

劉夢松字國夏號璘蒼萬歷戊子舉人乙未進士父存德仕廣東副使善大書工古

文詞夢松教授揚州歷國子助教刑部主事恤刑廣西陞員外郎中尋知台州府

善政宜人台人祠祀之遷江西按察副使秩未滿致仕弟夢潮閩書參舊志

張繼桂字廷高鳳徵子由龍溪學中式萬歷戊子舉人乙未進士篤親信友意氣倜

儻授華亭知縣裁罷常例不避權勢調松陽神明豈弟均役清田催科聽訟鞭朴

不施而賦額無逋教化大行卒於官歸櫬後家中蕭然妻孥織作自贍華松二縣

祀之名宦閩書參清白堂稿處州府志

周源字子濬成化甲午舉人戊戌進士家貧有志節初計偕北上鄰舟夜遇盜源因得其遺金百兩盡歸之知石埭縣律已廉臨民惠遇災能恤有大悶鎮楚路遇舍人子入縣求索源執杖欲奏之闕更杖舍人子乃解入爲兵部車駕司主事奉身清苦人所弗堪中官汪直怙寵用事嘗被內密旨襲檢朝紳家至源篋無長物僅錢數十服其廉由是名震京師一月之內陞本司員外轉郎中調武選卒櫬歸不能葬憲副邵莊行部至哭以詩云有身全白璧無地坎黃腸命有司葬之祀鄉賢

舊志江南省志

林啓字仰之號海峯魁梧軒爽不欲一事居人後介而能容方而不腐爲文有奇氣成化丙午鄉薦第一與蔡清相次發解而并以易學倡鄉人爲安陸州學正遂以易學教士安陸之易實啓開之做胡文定法爲教人士循軌遐邇莫不聞其名分校順天四川得士數十輩皆名人報績殊等遷國子監博士及門如趨韓吏部遣子受經三登賢書一成進士復遷南國子監丞吏部侍郎楊守陟攝祭酒常詣京或請他攝楊曰仰之在毋須六舍生羣請之吏部遂攝祭酒嚴公有恩監故有饌錢費歸公啓曰是諸生故物也人盡給之宏治壬戌迎母至京閱月餘而啓病卒

同安縣志

卷之二十八

人物錄 鄉賢 二十

於官年四十九囊無一金六館諸生爭致襁僉都御史林俊以所自預深衣方履斂之祀鄉賢嘉靖中孫天德以貢歷廉州推官路南知州廉人祀之名宦

閩書林文

丁華成化丙戌貢士授封川知縣剛毅果斷省節浮冗九年考滿民不忍舍力請當

道再任三年乃去

閩書廣東縣志

黃偉字孟偉號逸所性敏而慤嘗就府小吏投筆曰非丈夫也棄去讀書太武巖領正德庚午鄉薦從陳琛學易所得益深登正德甲戌進士授南刑部主事治獄得情以清慎明恕著聲公暇求道南四先生書溯穎昌授受微旨以自勵陞本部廣東司郎中歸省嘉靖初應詔陳九事首論敬德必親賢儒遠近習輔弼必任老成去軟熟節用必自裁減貢獻始除剝民巨蠹必革鎮首他如臺諫重守令養人材明職掌正憲體率中治機又上定大禮疏斥張璉希寵嗜進妄誕不經上申明舊制疏改正京畿御史不得仰部司抄奉案驗出守南雄有例金萬餘悉卻之節騶從省徭役明禮教禁游女去淫祠介直無所顧忌按察使檄民夫舁蘇木署牌還之曰本府不忍勞民也巡撫欲丈田加稅堅執不從甫三月遂疏歸老稚呼號載

道旋以當道薦改授松江府時張璫當國同年吏部侍郎霍韜私爲解且勸一謁
偉託墜馬傷足繳除書歸自是累遷不起惟以養親講學正家爲務丁艱三載絕
迹臥內往還墓間哀聲感道路每晨興具衣冠展拜家廟冠婚喪祭盡革舊俗鄉
人化之嘗種瓜東郊外日徜徉其中當道慕而就見則與盡白所聞冤抑事不必
識其人也人知而謝輒峻卻之嘉靖十六年泉饑巡按李元陽請主賑事偉且暮
區畫必欲無一人遺無片刻滯無斗釜濫殫神畢力疾作而卒遠近咨嗟琛哭之
慟曰天喪吾道也臺察諸司矜其清貧重其行誼爲營田供祭建善俗坊偉孝友
天植慈祥簡易有進退大節不爲苟得不厭困窮其論議如陸忠宣冲遠如趙清
獻出處如陶淵明惜不得大用見諸施行蔡元偉稱温陵人物謂朱鑑李聰蔡清
陳琛張岳林同顧珀吳銓林性之與偉爲温陵十子皆無愧爲完人所著有海眼
存集祀郡邑鄉賢祠閩書府縣志清源文獻清
白堂稿紫峯文集合纂

林應字子唯號壁峰貢生有文名楊逢春傅鎮皆出其門後爲湖州司訓丁母艱歸
士人走送多泣下後改彭澤卒於官所著有四書解便覽壁峰集節村榮
墓志

黃驥字德倫號梅莊能詩正德初任崇明典史寬仁蒞民臨事善斷以廉聲稱陞句

同安縣志

卷之二十八

人物錄 鄉賢 二十一

容主簿

崇明縣志

黃良弼字嚴夫號白泉正德癸卯舉人授汝州學正州地簡僻人才落寞良弼以所
學爲教文風漸振克稱厥官陞南京國子監學正六館師生成推讓焉良弼才氣
俊逸而行率直臨事不避忌諱竟以是罷官歸囊如洗淡泊自甘人以此高其行
年六十有八卒以下舊志
列循績

許勛旻字仕閔號松壑城內人通權應變明陰陽卜筮之學洪熙元年有司薦爲泉
郡陰陽正術嘗奉命攝永春德化二邑令事撫字有方民懷其德及歸父老餞以
聯云桐城烏識來時路花縣民懸去後思卒於明正統十年吳錫琮探
許族譜補

謝崑字鍾璞號次峯在坊人正德丙子舉於鄉以親老乞學職得金華訓導嘉靖
己丑成進士歷知溧陽成安二縣持身潔而馭吏嚴溧陽民喜爭動以財賄取勝
崑一律以理法期年訟息在成民尤安之擢南戶部主事監鈔北新關鑄銖弗染
商船二稅取足常課雜費破格除之吏白除之必斂怨崑曰寧怨歸己無害歸商
由是清操流聞得代惟圖書數肩而已轉南兵部職方員外郎未任卒崑温厚質
實財利不入於心生平不樂人逢迎亦不能逢迎人歷官十餘年未脫寒酸遇賈

乏弗恤惟賦詩讀書其卒也當道助賻始克蓋棺同人重其行誼祀鄉賢

閩書參林次崖文集

王佐字子才翔風大嶠人嘉靖壬午舉人初知睢州值河決竭力捍禦河卒平睢人建回龍廟河濱生祀之擢高州同知南戶部員外郎以持議忤大司農出爲兩淮運司爲人剛介在高佐離解課者再而家甚清白屏居年八十三矣睢人請於督學祀之名宦不知其尙在適移文至今徐待贈之詩曰白頭如越世赤子未忘慈百畝家無羨千秋食有餘亦竟以其年卒

閩書

陳健字時乾號滄江正德己卯舉人嘉靖丙戌進士授刑部主事歷四川司郎中決讞鯁直不阿上意出知南安府政務寬簡與民休息修南安志士論稱其總繫綿邈持論宏遠調廉州府再知南寧爲政惟勤撫綏不務因循歸田後課子孫崇先祀敦睦無閒云及卒許辦志其墓

閩書

林大梁字以任號雙湖嘉靖丁酉舉於鄉授寧海縣令縣無城郭與黃巖接界倭寇黃巖大梁日夜傭工築城樹柵其上編丁壯訓練固守倭至令守者無譁臥旗偃鼓伺之倭疑有伏逸去方聞寇時請築城比報可而役已竟絲毫無所取胡宗憲上其事官寧海八年調化州又調考城以得罪中貴罷歸

采家乘

同安縣志

卷之二十八

人物錄 鄉賢 二十二

蔡宗德字懋修嘉靖辛卯舉人通判廣州活漳泉之通番船者百餘人有甲盜葬乙地乙遷其棺他所甲以棄棺訟宗德佯不聽第約日令乙遷而棺果還故處又有弟亡僅一遺腹兒兄利其產謀一夫婦冒爲己子復謀一人證之宗德訊佯怒令棄兒於水弟婦哀慟求免冒子者略不動乃責諭其兄薄分以弟業丁艱復除台州活莆田被擄者十餘人調梧州卒子貴易孫獻臣

閩書

呂文緯字道充號壘石涪州人嘉靖辛卯舉人授藍山知縣爲民求便利日搜其蠹弊而芟除之才識敏瞻庭訟一言而決胥吏靡竄手舊有徵輸餘銀吏以羨白例充私費文緯請歸官充公監司大其請遍移旁邑曰令不當如是耶往上官按行部邑庸鄙者或有需求至藍獨無私饋吏懼見謫文緯不顧卒皆敬重之居荒徼間蠹蠻蕃育數患苦黎民一日掠至城下文緯勒兵追捕俘數十以歸度其勢可盡殲建議平糶當事難之文緯指畫陳可取狀遂委任其役按地圖部署兵所從入率敢死士搗其巢窟糶窘乃求撫文緯曰聽撫卽吾民也定爲約束而遣之糶遂平上其事於朝民立祠祀焉陞四川簡州知州未任報罷文緯誠實果敢居官廉而有爲其平糶之績尤偉而卒見排不錄中丞劉凝齋在湖藩時詳其事及撫

于閩益加敬重凡時政得失陳說往往受聽其居家仁孝田宅盡讓與弟又置祀田三十畝以奉祖先族黨交稱焉

參傳雲
錦文集

盧天祐字以順嘉靖丁酉舉人授永豐知縣當嘉靖之季分宜當國賄賂熾行直指行部率多訪惡人罰金具賂索永豐天祐第應曰無有縣故無城賊寇雲擾廣兵袁彬等千餘人應召殺賊反搶掠爲亂縱橫閩浙間天祐刊木壘石塞蹊隧蔽關隘分兵防守有捕得通賊者立斬之廣兵至聞其清德竟不爲害會當入覲直指以邑遭殘破奏請丞代丞居下考中道遁去銓部以此連天祐坐失官爲令七月耳歸無以爲家永豐人建祠祀之

書閩

王時拱字曰臣號印洲浯洲人嘉靖庚子舉人榜姓林時年甫十九選授杭州通判所部儲峙供億事極鹽米而豪猾吏巧爲乾沒宿弊如蝟至則多布耳目起發弊端徐爲條教搜剔之異時賦入賦長輒先饋主者以爲例時拱曰如此官自乾沒何以禁下痛革之吏乃咋舌不敢動民樂輸將已而歷署仁和富陽錢塘海寧諸篆皆有政聲而富陽節約愛利尤多民尸祝焉浙苦兵乏儲一日健兒脫甲叟叟道路爲請便宜發帑金以給當事者讓之時拱曰帑金易集耳卽有他虞帑金寧

同安縣志

卷之二十八

人物錄 鄉賢 二十三

足愛耶卒白大吏許之譁然誚讓者乃服其識巡撫梅林胡公檄委團練鄉兵日夜訓督卒乘服習課績爲最薦於朝璽書賜金擢廣信府同知閩浙孔道游寇出沒飭扞擗惟謹有山東劇賊二十餘輩將入閩爲亂詐稱應募乘夜闌入城廉其狀令游徼給食謾爲好語存慰之約旦日給牒遣行而潛使吏掩捕比曉已執送庭中無一脫者礦賊連結倭寇由贛內訌信州攻陷永豐玉山二縣且及貴溪貴無城民傳警各鳥獸散時拱署篆乃多方倡率勇敢守要扼險設伏置疑十餘日邑賴以完旣而援兵至賊皆殲焉城貴溪度宜鳩工督役不數月而城成至今賴之奏聞復賜金蓋異數也在任凡五載值太守入計攝府事比守回已交篆而是夜府署火仍引爲己責竟以此告罷歸念浯洲孤懸海島儻居晉江安平堡更治別業於水頭村奉父母婆娑燕喜閒攜漁樵籜冠葛屨散步溪山酌酒賦詩酒如也父母年逾九十時拱亦七十孺慕益篤待兄弟尤摯愛旣居安海丙舍腴田在浯洲者概割畀之仲弟歿更厚恤其孤後爲親治壽域於浯洲湖邊以旁二壙自擬曰吾魂魄歸舊邱依親徜徉爲快耳

參河
干集

李春芳字實夫號東明賢祐曾孫嘉靖庚子舉人庚戌進士性警敏年十二食餼十

六領鄉薦聞羅達夫倡教師事之居官清苦初試戶部奉命犒大同軍故事凡遇部使至輒具豐儀爲餽春芳一無所持而去授刑部主事執法不阿卹刑江西有懷金至者正色拒之奏報稱平出守潮州省訟牒蠲贖錢適有倭患軍務旁午春芳峙糗糧繕器械募敢死士激以大義明紀律冒矢石潮得無恙潮人祀之年四十二卒祀鄉賢著有白鶴山存稿

清白堂稿

王三接字允康號晉齋未冠領嘉靖癸卯鄉薦庚戌登進士授南戶部主事分司鳳陽調度軍食力別乾沒積蠹羨纒千計會倭寇軼三江留都戒嚴改職方協司郎中擢守韶州洗留獄雪無辜旋病卒年二十二韶民縞素哭踊如失所生櫬歸囊橐蕭然無錙銖之遺三接天性孝友敦倫睦族與人坦夷不爲矯激之行聲色貨利視之淡如逾壯而歿時咸憫之祀鄉賢

書

林叢槐字應昌號三庭東市人年十一游庠有奇童稱嘉靖己酉舉人丙辰進士授饒平令年未及壯而蒞事精敏若老吏粵賊蝟起張璉爲之魁聚夥萬餘招撫議起叢槐單車往諭賊或戕其役人以恐動之神色自如賊亦畏服竟羅拜擁衛而歸已而倭來攻城城援絕爲浚濠開窖日夜登陴募壯士共守城卒完士民爲金

同安縣志

卷之二十八

人物錄 鄉賢 二十四

城保障圖以紀功再受賞四登薦擢南戶部主事邑人立石紀德建生祠祀之在部未久復以拾遺罷歸構別業於城西顏其堂曰崇貞時與同志杯酒唱和郡丞陳鰲每過其山齋欲捐腴田以闢其門徑固辭焉按臺陳海山邑長倪兩山高其操嘗捐金以助屋資晚慕金陵吳陵之勝嘗贏糧一過之竟空囊歸曰吾游足適矣所著有明農集而止修養氣二說則其晚年筆云

清白堂稿

張應星字子翼號菊水自幼開敏喜讀書從晉江史於光邑先輩林希元學盡契所蘊蓄少失父兄常懷哀慕每忌前披其所藏訣語悲吟墜淚及辰衣素食蔬終身不改嘉靖戊午歲貢授會昌訓導揭白鹿洞規教士督學使者余曠以德行求士諸廣文入試分授片紙令書無德行之尤者應星獨不書學使怪問之曰諸生性質不齊然皆可自改苛求之恐累終身學使大喜因試以世變江河詩應星賦末章曰厥行惟何行已有恥有恥云何不殖不邇顏生四勿聖門要旨學使曰張廣文自謂耳嘗戒其子曰與富人言雖窘毋自說若見爲求也與貴人言雖是毋過贊若見爲諂也轉清江教諭道卒所著有四書大略易經管窺燈影子日益舉人

黃傑字一貞號忍江嘉靖乙未府學選貢第一歷西安麻城訓導海康教諭伊府教授致仕三辭署印操若冰霜士有餽必力卻之沐其陶鑄者甚多所至多有可紀在麻城尤著始至謂諸生曰吾初授官不寢竟夕念官名訓導豈漫也哉訓字從言從川朝廷欲吾與諸生言善相切劘也導字從首從之從寸欲吾首躬行示所之尺寸莫踰越也諸生聞之知傑欲舉其官矣傑多聞善談論對諸生竟日無一庸俗語聽者忘倦才者愛之中才者教之貧者卹之時以鄉先哲蔡清張岳林希元諸長者爲諸生誦之凡行事不自點污亦不爲崖異外不急切而內默喻人於道既轉海康諸生祖送塞路傑留衣一襲爲代者別以示傳衣之意其後代者亦勉效傑麻士賢之歸居橙山之麓學者稱忍江先生卒年七十八閩撫耿公定向其門下士也捐金治葬爲之傳楚粵皆祀名宦

閩書廣東通志

郭夢得號肖野在坊後郭人嘉靖壬戌進士初授潮陽令潮有逋賦之累民罹其害夢得爲陳於當道以他項銀補之民歡呼戴德陞南京戶部主事時上重方士分遣御史訪求天下符籙夢得以東南倭患度支不給宜節用以備軍需疏留中調廣東瓊州府瓊產珠上官採辦吏役緣以爲奸力除其弊所屬規例悉行蠲免廉

同安縣志

卷之二十八

人物錄 鄉賢 二十五

聲著於粵中

舊志

陳榮祖字克紹健孫嘉靖甲子舉人授永安令出入常賈糧僱役地方無擾革保家以杜需索汰冗役以省詐冒民被火者卹之被疫者糶之立社學選羅光宇等十餘人爲社師課其學程九丫樹有白額虎噬人齋禱城隍立斃教民始種麻豆芋薑閩閩利賴民立祠刻石像生祀焉以清廉卓異陞德慶知州盡革陋規卒於官櫬經永安焚香哭奠者數十里不絕永安祀名宦

廣東通志永安邑志

蔡貴易字爾通又字道生號肖兼宗德子嘉靖甲子舉人隆慶戊辰進士授江都令丁內艱服除補崇德復包角堰以捍海潮創尊經閣俾諸生講業含山巨盜楊雷潘榜者糾聚橫行浙以西苦震動臺使者謀遣將兵之貴易用閒計擒其魁餘黨解散三方安堵遷南京戶部陝西司主事徽人商崇德者感貴易不擾迨至姑蘇釀四百金爲獻貴易峻卻之諸商歸而立四知亭侈其事督錦衣米鹽入倉出納十年無批折晉浙江司員外督浦口倉遷祠部郎中罷教坊司供應清朝天宮侵冒出知寧波府時余有丁爲相貴易座主也寧人議開海外金塘大檄二山謂可墾腴田二萬畝佐軍興有丁從中主之監司業唯唯促畚鍤役貴易曰此國初所

徙地也役蒸黔而資巨室詎庸利乎既力白於上官復究極害爲言有丁復書曰鄙人不知其不便若是事遂寢諸衛所賂結府胥借軍儲數千無還計蒐致之法餉蠹一清海上漁商二稅舊輸郡帑議貯之節定二邑著爲令曰郡牘故在耳寧東門外跨大江爲浮梁兩淮隙地爲豪家占以築室設廛市渡者擁擠多溺於水癸未大水壞舟梁漂溺百餘人貴易爲文祭溺者按圖籍得其侵蝕者折其材而平之更新道路浮橋艤舟二十餘艘鐵纜絡之屹然中流自是往來無患士民立碑頌之遷貴州按察副使署督學校所拔得士署司篆出納維謹不問羨擢布政使司參政所部酋安國亨嘗遣人投牒若將有所餽者貴易叱牒還之自是安酋頹首受約束曰畏使君清耳晉浙江按察使浙士民聞之喜曰是故寧波守也會吳興董學士范司成事起訟蝟集貴易一切安靜鎮之曰是無賴子相煽安足聽也撫按知貴易不爲動則徑下之道府而董學士家破范師成竟投繯死事聞神宗震怒當事者咸獲重譴人始服貴易能持重得大體會入覲爲讒構所中坐鑄一秩歸貴易恬退寡援挺立獨行易簣之日囊橐蕭然蘇濬顏其堂曰清白寧郡崇邑皆祀名宦萬歷庚子祀鄉賢所著有詩文集子獻臣

通志閩書
浙江通志

同安縣志

卷之二十八

人物錄 鄉賢 二十六

池浴德字仕爵號明洲嘉靖甲子乙丑聯捷進士授遂昌令爲文誓神期不負蒼生設防守置木皂澤枯骨多異政故事郡守應朝時里甲斂百金爲贖浴德代守却之會新守至搜舊案山積前令不能決者日下檄追督浴德檢三百餘案各別年次輕重平反勒爲數册上之逮繫悉空守大喜追徵詳揭賦額於時寬以限期不事桁楊人爭樂輸初遂民往衢開礦爭利不均蜂起爲盜上官申禁凡入衢者須告縣給符否則以礦徒治之後衢與遂民仇者皆指爲礦徒送之官無一脫者浴德白於衢道毛公曰一里往來事事豈能給照十室忠信人人豈盡礦徒毛公立弛其禁民至訟庭一毫緡錢不入官只袖米半升往返即可結案安業咸稱爲池半升隣邑有難決者悉檄剖之丈量議起編派既定有以多爲寡者有全畝隱匿者先拘豪家置之法懼乞再丈許之無一差漏有浮額者充學以贍貧士緡雲諸邑爭告當道請浴德往丈編法如遂百姓歡欣擢南吏部考工主事民赴臺乞留編賦四閱月編成黃册乃就道至龍游萬人曳舟三日不得發行壯者奪舁夫肩之夜半解纜慟聲遠聞衆爲蓋石亭於西明山水滸曰曳舟亭鐫云江水比恩猶有底溪雲護石更無心後祀之名宦至南都三月轉北吏部稽勳司丁外艱抵家

僅餘四十五金起補原官清介端嚴無敢干以私遷考功員外陞郎中調護士類
嘗與相張居正相左會汰天下冗員居正戒部汰其人不復職浴德竭力調停得
不汰者十二三有楚司理趙某行取入京爲南部所揭居正欲斥之力持不可居
正趣益急浴德稱疾而太宰竟逢相意罷之轉太常寺少卿有冊封之命事竣告
歸屢徵不就諸當道海上事宜皆就決知無不言奸宄斂迹盜賊相戒不入境年
七十九卒是日大星自南墜有聲山鳴三夜城北大石忽催人謂是其應云所著
有空臆錄懷綽集居室篇爲詩深厚如盛唐祀鄉賢

閩書處州志
巖集

李鈿嘉靖間由掾吏授增城縣丞慈惠愛民甚親之性廉介適烏寇掠海上郡邑
戒嚴一日按訟者一人納其貲贖民訝其改操逮暮碎其金攜登陴悉犒守者蓋
以日久恐懈故勞而固之也其通變類如此尤敏練有幹局會郡築邏城甚急諸
司檄鈿董其役築者歌焉又從督撫進討兩源及置龍門使鈿往視形勢盡圖其
要害上司歎異後轉布政司經歷

廣東通志

葉明元字可明號星洲孝友喜讀書隆慶丁卯戊辰聯登進士授石埭令時政尙嚴
元獨以教化寬易爲理省浮費清治獄裁減差使以節夫馬遷南刑部郎有百戶

同安縣志

卷之二十八

人物錄 鄉賢 二十七

者張居正同鄉人殺人於市主者欲庇之明元執不可竟抵法出守南安設約要
束巡行勸課禁溺女敝俗先是天順間大庾學併入郡學中而道源書院爲居正
所裁明元入覲具疏奏復大庾學及書院詔下撫按竟如其請遷貴州按察副使
諸苗怙亂潛畫方略逆酋相次受縛因爲建衛設防浚河徙民諸綢繆甚具遷廣
西參政卒於官所治皆立祠明元性孝友父母有疾終夜抑搔篤愛弟妹俸入悉
共之卒後家中饘粥幾不備嗜學好古官暇輒焚香展卷有評注國語檀弓行世

祀鄉賢

閩書
江西南通志

林一材亨泥人初名一雉字以誠號玉吾隆慶丁卯舉人辛未進士授南禮部祠祭
司主事於典禮多所咨詢勒成篇帙陞郎中復除戶部河南司郎中裁宗藩額外
陳乞又題糧額必準弘治十三年例不許浮增邀功時張居正方行丈量法一材
倡議無浮糧州縣不得槩丈以滋擾擢太平守革鹽號以惠商分稅契於屬邑郡
俗多誣命之獄爲細辨折嚴遣償澆俗頓革遷浙江副使備兵金衢則重繩永康
之婪吏諍留豫備之倉穀卽上官側目不顧晉雲南參政裁軍伴分礦稅臨元一
道遂爲冷局滇撫蕭公以邊才薦調山西參政以媒孽左遷冀南副使訓練綢繆

引馬泡泉入學宮設立名籍以束宗藩以親老乞近地尋擢廣西參政艱歸汾人
建生祠祀焉一材樸心質貌不干外事至地方利病則侃侃不諱奸商以溷鹽爲
官場謀設運同分司總之又如浦頭河泊安民巡檢皆害多於利者力陳其弊於
當事而疏汰之至今便焉屢膺賓禮年七十九卒祀鄉賢

清白堂稿

洪邦光字世龍號賓吾父居正以貢司訓武進有學行邦光嘉靖戊午舉人隆慶戊
辰進士性沈靜簡默望之恂恂然至其爲政度民便利竭蹶成之初守無爲州州
除養馬免糧田外一切歲辦不均民困賦役流移者數邦光履畝均田酌議申請
分秋糧夏麥絲絹糖油四則以稅糧馬價照畝均攤自後垂爲定例民大便之擢
同知雲南府理他郡訟獄錢糧悉得其平所過肅然亦無交往時太宰嚴公清熟
邦光治狀曰是當專城以理吾郡者命下果然刑清政簡士民安之秩滿陞貴州
副使備兵都勻樂平司叛苗樂禮生挾士官宋廷瓚夙仇糾衆反流毒甚慘邦光
率知府梁柎集兵勦除與指揮婁聯璧揚威定計擒禮生誅之宣示威信於是樂
平者牙九股等叛苗各奉約束久之擢參政尋擢按察使備兵川東屬有土司跋
扈督府將兵之邦光謂是蠢爾者招撫可服躬至其境勘處土司感泣聽命邦光

同安縣志

卷之二十八

人物錄 鄉賢 二十八

在都勻時嘗條陳地方事失僚長意已僚長撫黔修隙因以黔藩事論調邦光念
父母老馳至家杜門掃軌朝夕侍奉未幾卒所著有三則要言祀鄉賢

舊志

李文簡字志可號質所嘉靖戊午舉人隆慶戊辰進士知無爲州甫離書生老練如
素吏撫綏安利不搏擊以取名然法所不可萬夫不能奪地當衝道能節約困者
以紓囊無長物民有口碑遷肇慶府同知州人擁道攀留肇爲制軍開府地重劇
事多屬辦批卻導蘇恢恢游刃總督石汀殷公宏才大略文簡以謹節濟之不斤
斤希旨而殷敬重之郡縣缺必委署焉治一如無爲會征羅旁以監軍在行督勦
決策厥勞懋焉臺使薦牘有貌古於僧署清於寺之語人以爲實錄秩滿入爲南

戶部山西司郎中卒於官未竟厥施士論惜之祀鄉賢

閩書清
白堂稿

陳榮選字克舉號鼇海健孫榮祖弟萬歷丙子順天鄉薦初選劍州牧未行丁內艱
復補儋州別戶數清訟獄申六諭勸農桑建欽恤堂於蘇長公之載酒堂傍率士
子講學其中有拾金者爭首發榮選斷歸拾者而責首者曰天賜彼金不平何爲
稅璫權稅驛騷民苦之榮選故饒資重義運家中貲以應徵役不賦民戶不費官
帑民戴德出望外黎人梗化撫而招之不用命就俘者察其輕冒縱而釋之題其

刺而讞之牘曰冥積遷廣州同知攝篆香山海泊所湊夷寶所聚清介一如平昔稅璫欲多稅額榮選爲香山人力爭侃侃披陳一洗同官脂韋之習見璫意形於色遂棄官歸榮選歷官州牧府佐父老並肩城邊裝遮道泣留僮廣人皆祀之而僮人去思尤甚與陳節潘楠合祀稱爲三賢祠在家孝友好施出爲人後事其父母並隆所生里人黃姓有兄弟爭死之誼久繫獄中白而出之衣不重彩食無兼肉有以緩急相叩靡不應者居恆手不釋卷車途客舍莫不挾冊自隨所著有易四書旨禮記集註南華經道德經註解祀鄉賢

閩書遜
卷集

黃文炳字懋新善書能詩萬歷癸酉舉人丁丑進士任東陽知縣爲民履畝以免賠累擢南戶部權淮安關關陳紫峯琛舊所權處也文炳至署其堂曰仰止其行政皆師之擢守平樂政治持大體開賓興修縣志孺童子弟擇其通文者束以青衿皆瞿然向化置驛馬復餘田民甚德之擢雲南副使署督學事礦使鄭某虐焰殃及諸生意欲主司詰治以謝之文炳不可遂矯誣論劾先後列二狀獨蒙溫旨且詔礦使無生事時稍忤中使者輒被逮繫恩宥自文炳始遷陝西參政卒弟文炤

閩書廣
西通志

同安縣志

卷之二十八

人物錄 鄉賢二十九

蔡用明本名霽字用明以字行更字晦仲號見南萬歷己卯舉人初授大田教諭旋補長泰斂士範士俱有禮法陞樂至知縣修學課士縣有採木之役大木所產皆邊夷熨道岡壑筭崖絕人跡去治所數千里故事給官鑿募民役先是多相冒規免展轉株累又民苦先出募錢事竣竟不得官給往往破家用明下車見耆老人給小方令疏注鄉之巨戶各以其所臆疾書毋得交語既上爲參稽糧冊閱其丁賦之上下比證甲牌覆其塵居之多寡然後榜示占役者姓名於縣門丁弱賦強則賦其金募人不任者許自訴而蠲其實者扶其誣服與妄求免者乃更爲立補助之條定番休之規信給領之令往役者官護其家禁奸民毋乘出造獄擾之木分三運以十之六爲及格最後乃滿十採木已邑中旱疫相繼用明按籍勤撫以紓之優禮百年黎民价予冠帶歲時致餼課士出俸鏹供筆札茗饌而大作新其廟學豪猾犯科求贖不許必痛懲部使徵無礙金據理折之氣短而止遷淮府審理未行又有征播之役大發民夫餽餉用明猶精心爲之部署行伍相補助戒以緩急相扞如其初至調度採木時督木使者過縣民擁車言令治狀涕泣祈留軹不得發臨行猶奏記督學請廣多士解額及發舟泛裝岸石以壓險陸續鬱林非

虛語也子復一

閩書遜
卷集

張日益應星子萬曆壬午舉人令靈壁始至下寬恤令興利除弊務殫其猷時河工興作動派里夫民苦額外之征十室九竄日益申文臺司第用帑金招募或願賦役者如數復其身上司急催役日益具靈壁飢窮狀請寬之以賦不及格轉王官老幼泣送之爲立去思碑

閩書

王道顯字當世號瞻明從紫溪蘇濬游遂於易萬曆乙卯舉人癸未進士任台州司理慮囚多平反署府篆及天台黃巖太平等邑俱有政聲入爲御史卽抗疏劾兵部尙書王鶚失邊備請以王遴代所條陳悉中機宜出爲青州僉事青故多響馬好劫鬪道顯設法擒治爲之少變遷雲南參議丁內艱歸民尸祝之起浙江兵備肅衛伍核才官倭寇聞風遠遁遷湖廣按察使解組杜門著書得理學之傳卒祀鄉賢

蔡獻臣字體國號虛臺別號直心居士浙臬貴易子萬曆戊子舉人已丑聯捷進士授刑部主事時帝久不視朝抗疏請定國儲忠愛懇切諸所讞理一歸平允司寇王元美稱爲用世才調兵部職方主事推補將弁惟才遷禮部主客郎中四方朝

同安縣志

卷之二十八

人物錄 鄉賢三十

貢一依典禮調儀制司郎中冬至習儀臺省爭班獻臣力執舊典復論楚藩假子一案忤右宗伯意宗伯遽罷深恨之已又疏請福藩之國鄭貴妃恚甚夜發內使執之不爲屈及旦以舊典爭帝前同官爲之危獻臣神色自若帝嘉其直遣出以參政銜分巡常鎮遷湖廣按察使有爲宗伯修憾者借楚事參劾削秩罷歸百姓遮留立祠尸祝抵家讀書東山李春開延修邑乘旣成得春秋謹嚴之旨尋起浙江巡海道改領提學道識拔精詳狀元朱之蕃卽其所取士也浙人士爲立生祠天啟間閩巡撫鄒維璉以學問純正奏御賜里名瓊林召爲南光祿寺少卿爲瑄所誣削籍歸邑之海豐莊田上有朱埭迭決貽患屢決屢壞迄無成功獻臣出貲築岸於朱埭千九百八十餘丈歲以有收海豐田永保無事農人業戶頌功請何喬遠爲文勒碑紀焉獻臣清介亮直師事楊貞復澈性命之學教人以敦倫實踐爲先所著四書合單講義旣釋微言單闡之復融大義合貫之故名其書取古解而參己意歸於遵朱嘗謂先正林希元正嘉間名臣有功儒者貽書提學馮煥配享文公祠鄉里利病休戚不憚委曲陳諸當道人受其庇著有清白堂稿仕學潛學講義筆記等稿年七十九卒賜祭葬贈少司寇祀鄉賢

通志舊志
參巖集

黃華秀字居約入南安庠萬曆戊子己丑聯捷進士授韶州府推官逮下仁慈事上端執精明決斷雪殺姑之冤釋代兄之囚辨伐冢之詭以最薦召爲南京浙江道御史剛果洞達條陳時事時東方有遼左之慮中原有曠稅之興楚藩有小人之構華秀皆上疏極言之官暇從德興祝世祿寧國張應泰潛江歐陽東鳳及郡人李范廉駱日升爲讀書之會相切劘如諸生卒於官不餘一錢諸公經紀之

通志

閩書
廣東

郭日烜字宗實號旭東萬曆癸酉舉人己丑進士授嘉定州牧歸奉母就養州轄六邑故稱善地有坊里之供酋長之金又有諸稅之貯州帑歲可得三千緡日烜概謝卻之會兎差不靖率督兵馬招討收捕擒獲六邑藉以安堵蒞任甫年餘循聲播川南獨以執法不阿屬員縉紳不無齟齬壬辰計後臺使有拾其短者主爵意難之而重違言者乃量移安寧州牧覲行留子奉母嘉邸至是母念歸急乃溯江入楚而日烜及長子基迎之荊州詭請母前欲乞養歸母不可日烜不忍別母奉與偕行至龍津卒年四十八僅遺圖書數卷周身幾不能備焉

舊志

陳基虞字志華號賓門萬曆己丑進士性孝友戇直寡諧初除蕭山令以忤津要左

同安縣志

卷之二十八

人物錄 鄉賢 三十一

遷移南雄府推官有橋權稅歲入萬金力辭不染署篆新會稅監負嵎徧爲蠱尾士民大變基虞保靖之辨首盜諸家冤誣活數百命前令鈕光斗附璫虐民增重餉急催科基虞悉心調劑民賴以安代之日焚香臥轍道擁不前與袁王二令並祀三賢祠晉南刑曹郎有貴人欲軋一異己者基虞堅持不可乃得解歷守三郡人多去思刺彰德時畿輔猝警大中丞范景文戴星入援基虞措置軍需咄嗟立辦朝野賴之擢粵東兵憲終以不媚權貴得調捐金倡修長興第三橋人賴之卒

年七十九

廣東通志

柯鳳翔字志德號桐岡萬曆戊子第四名經魁己丑聯第進士授刑部四川司主事尋擢員外陞郎中出爲平樂守丁內艱服除補贛州府守調慶遠守擢兩浙都轉運使以年老罷歸鳳翔坦衷質貌不矜能不藏機行己居官兢兢不爽尺寸其爲刑曹多所平反法所不可者雖權貴居間不稍動三綰郡符持大體不苛細至爲運轉則齷齪剔抉殆盡而守贛時亦辭權務不染指以故虔人愛之粵浙人頌之第以不能屈意徇上官計吏歸抵家居墩柄里第不入城市脫巾曳履莫知爲貴人也天性孝友常斥五百金置始祖祠及祭田族中飢寒者濟之意氣窮交始終

綢繆卽相背負不問藉以殯葬者六七家少年陵侮者不求報窮人負債者不責
通童僕有過怒而譴之不加撻能改亦納之一錢尺土未嘗有利於人卽操券求
售者必壓所欲去年七十九卒崇禎四年學使者何公奏請崇祀鄉賢

清白堂稿

胡明佐字良甫號拱柱萬歷壬午舉人壬辰進士授南城令爲政不事粉飾不求名
譽癸丑洪水淹沒萬家瘞亡恤存民沾其惠建太平橋爲民利涉縣多莊田賦役
苦累明佐力請編運行均糧之法著權宜永猷二錄後人遵行民賴之調宣城令
礦事起璫悍莫與撻明佐爲陳地妨顯陵右臂璫懼謝去一邑以寧陞計部出守
循州有巨盜出沒惠潮設法平之累遷山東參政以不避權貴歸宦囊雖淡分產
子姪無異視施義塚置田與鄉人輪祭人稱爲古直先生卒年七十有三

撫州府志

林應翔字源澠號負蒼晚號止巖又號念不先生萬歷甲午舉人聯第進士知永嘉
歲苦疫周親不相顧爲申收恤之誼歲旱縞衣躡屨迎龍母五十里外兩大沛丁
外艱起補京山巡勸課停車決訟楚藩構逆郢中騷動練兵葺城遷南戶部郎督
儲鳳陽出守汝寧汝黃之交有巨盜號自在王應翔殲之調廣州決積牘千六百
卷平反死獄八十餘一日以閩廣開羅爭議棄官歸復起衢州禮宣聖之後恤趙

同安縣志

卷之二十八

人物錄 鄉賢 三十一

清獻子孫貧乏者修郡志造橋建塔便民興士爲龍游民陳利病罷協濟米訪擒
劇盜滕奇兄弟覆其巢穴開化有程五龍等盜戕殺官兵使者發兵捕治近村民
惶惑鼓譟逐之兵歸告使者村之千餘家盡勝廣也應翔曰無恐獨入巢繫其戎
酋烏合悉散良民得全肖像祀之遷湖廣副使未之官卒年六十有二應翔好道
術兼通釋氏嘗自爲念不先生傳謂其爲文不古不今功名不浮不沈仕宦不穢
不清治產不縮不贏軀貌不高不低才情不巧不癡於物不兜不撇於人不冷不
熱里評不善不惡人品不雅不俗命其子曰卽死以此志我毋求人爲也其人奇
矯變化不可方物所著有止崑存稿

閩書何鏡山集
清白堂稿合參

陳穀字次卿一字式洲號天桓健曾孫萬歷庚子舉人榜名士侄初授無錫教諭有
知人鑒擢廣東新安令剛直廉平首除劇惡嚴詰奸胥寬里甲恤編氓免贖緩清
羨餘積蠹宿弊釐剔殆盡築兩炮臺於城北隅以固守禦甫年餘以忤權貴去行
李蕭然父老攀號遮道車不得前民思其德祠於南頭西鄉後權藍山令勤於撫
綏民有寧一之頌旣歸年六十九卒於家

廣東通志

蔡鍾有字恒卿萬歷癸卯舉人授興國令嫻於吏職能得物情邑黠訟著託他籍徧

控關提淆亂請於上官痛釐治之永樂中屯田至成宏間漸蕪府檄召民墾荒給帖爲業已墾者軍復爭之前令何應彪以刁軍害民請禁未久復爭郡守金汝嘉頗庇軍鍾有條陳源委言多切中守不能易修葺縣志手自抄纂自是文獻有徵前令吳宗周倡造石橋甫竣工鍾有復翼以扶欄亭楯雄麗壯觀行人利賴卒以直道不容於時左遷徐州倅守呂梁河堤河漫決無時奔漲疾風乘舫行波中幾葬魚腹者屢山東妖寇發去徐三十里鍾有以河夫爲卒畚鍤爲兵拒賊河上賊北潰走轉分水令卒於官

閩書參西江志贛州府志

洪纖若字時育萬歷甲辰進士筮仕提刑讞獄詳慎璽書褒榮之累陞司憲兩粵有

巨盜鄭詵歷年寇害閩浙江淮間纖若懸賞購黨擒之諸路悉平及權璫竊柄有

議毀澹臺子羽廟以建魏祠者纖若力排不許事遂寢未幾歸卒祀鄉賢

舊志

蔣芳鏞字任坦號鯨臺翔風灣頭人萬歷丙午舉人丁未會魁初授戶部主事差管

海運新泰二倉聞父病卽請解歸省補工部營繕晉虞衡督寶源局出守建昌以

明斷失權貴意移衢州時安奢作梗徵兵徵餉徵運衢民苦之芳鏞至曰是倍千

勛於尪羸之負也以在上曹時明錢法乃開鼓鑄代餉歲省民輸萬金復搜括朽

同安縣志

卷之二十八

人物錄 鄉賢 三十三

蠹節縮冗濫以舒民困黔運一郡坐五千名檄徵雷迅舉郡惶惶芳鏞以衢民征輸疲敝尤困荒災復捐俸賑饑刷冊均糧通漕鹽罷逋米爲民興利興學蔭湘薇時皆立祠焉壬午調廣東瓊州府歲饑捐賑全活無數任滿入都以開運河功授湖廣按察使司丙辰調江蘇按察使司愛民如子旋署江寧布政使司適黃河水溢淮揚徐賑恤備至百姓感之天啟元年因松江水漲歲歉乃開通河道導西北水由青江吳淞口出支河小江俱開往來稱便至今賴之後巡按湖南湖北適陝匪蔓延芳鏞退漢陽恐危百姓給貲令逃避并遣散家丁乃同二夫人陳氏赴火死時天啟七年丁卯十二月十日也壽五十五歲

郭有家采補湖廣衡州府主利祠記及申江崇侯廟中碑記

池顯京字致夫號念蒼浴德子萬歷己酉舉人授和州知州州有牛稅歲入千金胥

吏故橫暴一紙下鄉輒盡中人數家產京至首革之旋忤巡按崔廷秀劾罷起補

湖州通判督運入都屬有兵事閒阻黷阨始達轉懷慶同知以前運稽遲被議解

組顯京善文章精草隸畫尤絕倫晚喜禪學三任皆腴地而袖月載風以歸卒於

家兄顯方曾孫繼溥康熙舉人選曲周令轉鎮南泉幕

雍正志稿兗巖集廈門志

林宗載字允坤號亨萬萬歷己酉舉人榜名謾言丙辰進士初令浮梁有無賴緣瑄

棍獻民間田產假爲上用一邑惶駭宗載察其奸狀置之法釐別糧弊人服其精
明天啟初以治刑入爲兵科給事中歷戶刑左右進戶科都給事時邊費無度山
海餉費月二十九萬宗載請旨查核省去七萬又疏因餉檄兵因兵檄官侃侃切
中時弊進太僕卿攝太常事莊烈帝卽位祭告郊廟陵寢諸大典皆宗載秩之陞
太常寺卿疏乞終養歸書還淳二字於里閭優游泉石者十餘年年七十卒祀鄉

賢

舊志

周家椿號愛日萬曆丙午舉人庚戌進士授寧波推官丰采英邁判決如流攝郡篆
並署鄞縣執要除繁庶務成理捐錢置田於郡庠士民德之丁母艱歸起紹興推
官時淞中鹽課半出紹興家椿檢額外美金歲可數千悉汰革之推司理第一分
校兩省得士九人如馮元颺祁彪佳余煌章正宸皆名士有操行擢吏部主事歷
員外郎中屏絕私謁過吳門哭周忠介公而去惜名器破積習如寶城大工諸職
多由內授特加裁抑時邊疏多歸功魏璫力排衆議不少折節舉貢候選多淹滯
家椿謂此非國家待士意特疏通之而修郟者藉爲口實遂掛冠既事白終不出

浙江通志
舊志

同安縣志

卷之二十八

人物錄 鄉賢 三十四

周爾發字子祥萬曆庚子舉人庚戌進士初令吳縣均賦革羨捐俸修學置田贍士
署長洲調歙縣張弛如吳秩滿陞禮部主事神宗遺詔欲冊鄭妃爲后據禮執奏
事竟寢光宗大漸召侍湯藥偕勳臣禮臣入直禁中奉顧命識認太子時爾發以
祠祭司兼掌四司事凡大喪大慶郊祀賓嘉及光廟擇陵烹廟擇婚諸大禮儀皆
綜理無錯司讞南理督南糧節制南軍措置得宜前後凡九錫金六錫命時人榮
之終南京兆丞卒年五十九

通志

陳如松字曰南陳坑人萬曆壬午舉順天試以生時松樹產蘭故名初授蕭山令革
常例除罪贖嘗自未至酉連判三十五事當堂署案無稱冤者爲民興利而抑富
豪以邑水東去不利民財乃築壩截其流開雙河塍使水折而南注遠大通橋以
北注朱直指稱其吏治爲浙中第一以忤劉中丞調簡補信宜俗嫁娶傾貲民間
至不敢舉女如松諭以好生之德作溺女文風曉之仍編什伍設稽查以生女告
者錫鏹鈔更定資送儀節自是無棄女者旋改河源邑學宮爲勢宦占營私室如
松立毀其室復之擢守太倉事無劇易立解治訟大者爲勸解小者斥去之試童
子卷千餘榜發遺者求贖問姓氏誦其疵句輒走匿候臺司出餞則攜袖中錢市

糲食供帳上官簡脫雖譴責弗動以忤權貴拂衣歸破屋三間日坐釣於清泉白石間若未嘗官者足不入城市書法名家人乞書立應爲邑令時邑有物食禾布滿阡陌僉詣令告怪如松按視心答爲蠶自攜歸於廳事教以折解食烹爭捕取歲以有秋倉俗徧立生祠所著有蓮山集語鈔學庸解百篇詩老來吟諸稿

通志蕭山

志浙江志太倉州志平生叙錄合參

蘇寅賓字初仲號日門萬歷壬子舉人已未進士授崑山令時螻螻食禾徧滿田塍寅賓禱天爲民請命蟹去歲以太熟以執法失權貴意論貶寧波府教授崑民祠之秩滿陞國子監助教累遷海南兵備道革納餼積穀諸羨餘勒石永記轉湖廣糧儲道以不謁督糧權璫奪職歸家無儋石杖履自適卒年八十一

舊志

張朝綱字思勛號楚臺一號五孳九歲能文萬歷丙午舉人丙辰進士初授麗水令巨猾斂迹以最調永嘉有以白金假海鮓獻者召邵之適富人子殺人善事郡守諸縣長承守旨久不問朝綱治如法卒見忤歸五載起金谿令邑有虎患爲請命於神虎就斃分校浙閩所得皆名士陞戶部雲南司主事管新泰二倉監兌兩浙旋授正郎出爲廣西副使備兵蒼梧梧當兩粵衝獠寇出沒勤團練募義勇粵賴

同安縣志

卷之二十八

人物錄 鄉賢 三十五

以安署藩篆凜凜冰霜其在營衛屯伍市鴻船廠經理有法民立祠以祭梧吏有祠自朝綱始卒於官崇祀府鄉賢

康爾韞字叔玉萬歷己酉舉人已未進士授戶部主事督河西稅課羨餘不染毫釐歷郎中管通州廳時水淺舟行膠糧餉不前爾韞親履河干立風雪中督之得挽運如期以不謁權貴出知兗州府清獄理冤汰役革耗旱蝗俱不爲災以積勞成

疾告歸

舊志

葉成章字國文號慕同萬歷壬子舉人已未進士性嚴毅令長洲初至漫不省事人呼爲葉木頭既而判決如流錢穀利弊洞若觀火於是革陋政節官費絕包攬取其奸之尤者重創之吏胥屏息徵則不輕差一人亦不輕議一重辟獄訟清簡以廉能召試御史屢獻直言有培元氣慰忠魂諸疏按宣大兼學政陳邊防十策上嘉納褒賜差按江右陞辭有聖度宜優詢謀宜廣疏及行部則飭闡規蒐方俊禮名紳講聖學捐贖錢以賑饑民境內肅然督應天學士習文體一軌於正所拔士多顯達遷大理寺卿以執法獲戾權璫削籍家居二載朝議召用而成章已逝嘗有言曰吾智不能敏給而持之以慎才不能揮霍而積之以勤其用心如此祀鄉

賢

江南通志
蘇州志

劉夢潮字國壯號海若存德子夢松弟萬歷己未進士少孤守約奉母命南昌設法捕盜旁邑以寧改北京武學教授著十三篇註解擢禮部儀制司抗疏糾璫轉主客司朝鮮入貢以故事送土物閱之乃璞玉也直五百金卻之遷粵西副使分司蒼梧地去長安遠吏以苞苴爲故事夢潮操冰檠復卻三江權稅歲累千金三院兼之委署學篆有家門宿怨爲蒼梧屬吏夢潮以直報之自是釋憾修睦邑里稱爲長厚君子卒於官著易義畫前稿行世祀鄉賢子霖任舉人孫佺齡進士志舊

劉廷憲字秋岳天啟辛酉舉人初署沙縣教諭新文廟勤月課人文蔚起諸生爲建生祠於學宮之右陞桐鄉令清慎執法汰耗鋤猾每簿書暇卽與諸生講學課文所賞識多名士歸官後桐人建祠於皂林驛祀之卒祀鄉賢志舊

黃其晟字芝仲號元眉時薰子先世自錦宅遷居鼎尾天啟壬戌進士由內閣中書擢東城御史以抗直不容出知撫州南昌桂林等府有善政郡民祠之轉陞南寧道嗣聞懷宗之變同瞿式耜呂大器等奉明藩於肇慶旋從王遁緬甸爲清兵所獲錮獄六年至康熙壬寅釋之錦里初祖祀田不足置產業充之鼇島渡祖祠爲

同安縣志

卷之二十八

人物錄 鄉賢 三十六

世家所占爲之清復焉性喜楚辭漢書嘗題句云熟讀離騷痛飲酒細看傳註喜觀書可想見其胸次矣

陳昌文字清時號伯武古區人天啟壬戌進士授廣西平樂推官治尙寬和在粵九年歷署諸篆人誦爲九印召杜嘗曰治有三要清慎勤耳擢南刑科給事中士民遮道轉北吏垣疏請各郡邑立倉令縉紳捐粟以備賑劾尙書張鳳翼防西失職狀未幾卒官參府志

盧經字一得萬歷壬子舉人天啟乙丑進士初授行人陞侍御史巡按河南有宗室萊陽王者以受獻拏一諸生到府楚掠經甫下車卽明斷其曲王懼遣長史求勿疏弗許竟以此獲譴下詔獄少宗伯陳子壯科臣李汝璨等皆特疏申救始得論戌放歸年七十有九志舊

陳文瑞字應萃號同凡萬歷戊午舉人天啟乙丑進士授吳縣令潔己字民五載戴星按獄推法持情豪貴莫敢撓於癸獨尤加惠焉事上不諂過客搔擾必抑之浚縣治前學宮內外各河盡清所占喜親賢士大夫兩分校省闈解元沈幾楊廷樞皆其所取士也吳當漕孔道慮阻凍後期議藉民力代運文瑞執不可事得寢時

天下多故部議視產上下募兵充伍文瑞以家丁隸名民乃怙然洞庭有號天罡者結黨橫行密緝而置之法其黨盡散周順昌罹璫禍義民顏佩章等數萬人以激憤粹緹校文瑞護周出境復捐俸倡助爲輸所誣賊仍撫恤其家苦心調解郡人默受其惠及佩章等首事五人被誅爲葬而立之石曰五丈夫墓吳人有金剛手菩提心之謠前後疏薦卓異者三竟以不樂逢迎致仕歸卒年八十有四

江南通志

吳縣志牛若麟志

張璫字望之號知非崇禎庚午舉人甲戌進士授萬州牧首務教民建社學十餘所革陋規及檳榔園稅數千金有生黎出沒害民計擒其魁患悉平以異留任五載爲屬邑久逋累謫揚州鹽運判官尋陞瓊州推官有宦豪虐民置之法諸惡斂手陞南戶部主事晉北戶部郎中揭奏奸相錢弊召對稱旨勅差粵道糧餉聞變歸著有蕘對草家乘引考等集卒年六十有九

舊志

論曰邑自明清而後武臣多忠勇之士文臣多風節之士蓋其習尙與教化所醞釀而深焉者也請列傳及武功忠義二傳可以興矣孰謂志書僅以徵文考獻耶

同安縣志

卷之二十八

人物錄 鄉賢 三十七

蔡國光字士觀號賁服天啟丁卯第六名舉人崇禎甲戌進士七歲就傅經史過目輒成誦既釋褐令高安請免浮糧革除常例高安人建祠祀之已補鉅鹿修城池給牛種殘疆之民實賴以安召對稱旨擢授禮垣未幾李自成陷京師執國光使降國光歎曰吾不能捐軀從先帝於地下尙敢覲顏更事哉賊拷掠極楚後釋歸田里日惟焚香卻掃旋依鄭氏於廈門兩島破落髮披緇後築一樓栖止其上終身不下樓壽八十三卒

府縣志家乘

林鳳儀字朝陽崇禎癸酉舉人丁丑進士授戶部主事遷員外郎掌三司郎中事點給京衛月糧按籍皆虛冒白大司農不入告憂憤欲掛冠適青州旱蝗盜起擢鳳儀出守下軍虔禱甘雨立澍釐蠹弊釋滯獄寬贖鍰是歲蝗不入境以校士嚴絕干牘巨室憾之值齎使者苛責款迎遂告歸中丞欲疏留之方辭抵家僅圖書數篋曰吾以清白遺子孫卒年八十有六

舊志

張朝綬字思藻號青武青巖人崇禎乙卯亞魁庚辰會魁授職方司主事抗疏清核京衛冒糧數十餘萬陞郎中典試廣西轉江西湖西道駐袁州時郡北有天井窩強賊盤據民遭荼毒歷任監司剿撫兩困朝綬單騎抵穴開諭盜盡解甲陞雲南

督學民爲之攀輿因留任尋擢右僉都御史巡撫南贛清勤自矢後歸以病卒祀

鄉賢

以上舊志
列循績

郭貞一字元侯號道愍後郭人崇禎十三年進士授監察御史巡撫浙東福王立擢都察院右都御史有內監不遵朝班疏糾之宦寺屏息按時勢條陳屯田保甲洞見源委所交多吉士疏薦夏允彝陳子龍徐石麟徐汧沈延嘉葉廷秀熊開元等皆具忠愛之誠並乞召用又言憲長王夢錫以賄遷官選郎劉應賓黷貨乞正罪一時風采凜然南都破入閩適延平郡王開府廈門禮之後隨入臺灣居數年卒

臺灣通史廈門
志舊縣志合參

清

張汝瑚字夏鍾號虛巖崇禎壬午舉人清順治乙未會試以乙榜授清源令邑里役久爲累毅然釐除之羅白二都故有永濟渠透迤三十里歲久淤塞被隣封豪右占耕汝瑚請上官濬復之東於高白水屯營三鄉沃壤也萬歷初被水地荒民竄爲集流亡給牛種躬自耕墾皆成膏腴康熙間邑賢書報罷已四科汝湖建梗陽書院俾士肄業切劘是科丙午獲雋二人越次科己酉四人自是科第不絕而劉

同安縣志

卷之二十八

人物錄 鄉賢 三十八

基振竟掄元督撫大加敬重有兩省循良第一及三晉儀型之匾在任七年以盜案註誤報罷在源候代囊無一錢薪水悉民供之去之日父老遮道號泣送至數十里鄰封民亦爲墮淚嗣起補安陸府通判卻例金以千計校士論文所賞識皆名士解元劉善錫其首拔士也郡邑有水旱必議蠲賑得請方休性嗜學凡經史子集靡不熟復玩味購求明代遺文三百餘家評騭選刻膾炙海內爲文春和大致雅泉屬自王遵巖後罕有其匹所著有匏野初集二集賢賞堂文集節鄭重高聯壁序陳觀泰榜名琬字允雅號上庵崇禎癸酉舉人寬厚孝友清初任儀封知縣聽訟持平催科不擾緝劇盜卻飛蝗捐修學宮完雉堞除雜稅革陋規儀人德而祀之及子睿思登第遂告歸建祠宇置儒租百六十餘石以勵孫曾卒年八十祀鄉賢舊志劉夢齡字爾三順治戊戌進士授開封府推官以執法左遷雲龍州州判歷宦三十

載一清如水丁父艱歸

舊志

劉仝齡字偃仙霖任子順治庚子鄉試第二名令南陽勤撫字拙催科稱爲劉菩薩退休之後蕭然自得不入公門後生奉爲文章模楷舊志

許元鏞字世響號鳴和後浦人順治五年貝勒王帥師入閩廉其才薦授廣東樂昌

知縣代篆廣陵多虎患元鏞至一切利民事次第舉行虎遯去有山賊竊發勢甚熾官不能搜元鏞單騎馳入寨陳說利害賊頰首聽命陞肇慶同知尋遷王府內

史攝龍門印卒於官

涪洲見
聞錄

陳睿思字子將號鶴屏又號宜亭觀泰子康熙丁未進士授中書舍人耿精忠變請假歸省入都未幾回籍守制捐資倡修輪山朱子講堂進文學之士課藝甲乙之起補原職時清丈界外田畝解部溢額數百頃睿思以瀕海風高地瘠婉陳崩壓無時狀得照舊額勻輸轉行人修同安會館奉詔回閩公接之暇未嘗與有司通一刺晉戶部主事值閩粵海運議起睿思謂航海波濤不測非河漕比力爭之議遂寢出理西倉釐剔勞懃卒於官年七十著有可園詩文集子肇俊康熙乙酉舉

人

舊志

劉球瑛字子玉號惠菴積善塘源人都督同欽子康熙八年由優貢選華亭丞以最陞令任九載勤政恤民錢糧有不完者察其貧困捐俸貸賠積以萬計歲大祲請帑散賑不敷則捐貲以助廢己產數萬金活人甚衆大尹首薦賢能以疾卒邑人哭送甚悲建祠祀之

舊志

同安縣志

卷之二十八

人物錄 鄉賢 三十九

陳夢球號二受鼎孫永華子入白旗康熙癸卯以旗籍中式順天舉人甲戌進士召問臺灣遺事嘉其父忠義擢編修每對大臣曰此忠義永華子也戊寅運米赴高麗賑飢又航海自燕抵閩巡歷六省形勢險要差審山西巡撫互訐案已卯典試湖廣所拔士多捷南宮庚辰以侍講督學山西未任卒

府志

張金友字聲子從順里西塘人九歲能詩父斯壩名諸生也日課以經史數千字皆成誦年十六而孤遭兵燹託鎮軍幕府以自庇會草檄以其年少不之秘也友從旁言其不可鎮軍大驚卽囑署稿果稱意由是器重之其母聞之曰童子饒舌禍胎從此始矣乃自韜晦後海氛再熾逆帥聞其名欲致之因竄匿安溪山谷中數年迨閩疆底定登康熙庚申補科賢書初選得湖廣司理會國家裁汰是官改補仙游教諭時有縣胥陵諸生訟之宰宰右其胥欲以闕堂罪褫諸生友力持不可既而將交籲於上官因從容謂宰曰如此必皆有譴第某黜爲愛士公黜爲庇役輕重之際願明公熟思之宰爲改容乃直諸生又有郡司馬攝縣篆欲於縣堂責士友爭曰法此地無責士體恐後以爲例公何忍焉亦得罷巡撫李公以友賢疏薦之友請歸養李不憚因備言母老屢經播竄甫獲息喘不忍遠離狀李爲之泣

下乃歸仙游人勒石以志不忘居鄉排難解紛族姓無煩有司判牘者人咸重之
稱爲旋圃先生旋圃者友之書齋也年七十五卒子迪太學生工琴善奕書法更
精於繪事至今得其片紙猶值數金終身不履公庭以高行見稱云舊志
洪心澄字淳思號印川在坊人年二十登康熙丙子舉人任偃師令丁外艱歸服除
值臺匪朱一貴竊發提督施世驃延入幕中贊畫制勝多出其謀事平未議敘而
卒

陳還號素亭永華孫由正白旗應順天鄉試登康熙庚辰進士任開平令有廉能聲
丁內艱數月而開平山寇竊發勢方熾制軍楊公亟召還往撫之不旬日而平題
敘授督標前營參將總督孔公改題肇慶府同知以勞瘁卒於官

洪淳瑛心澄弟康熙甲午舉人任松溪教諭授江南六合令調儀徵革陋規矢冰檠
別奸除弊吏畏民懷家居足跡不入城市以上舊志

池繼善字曦侯康熙戊子舉人授達州州同丁艱起補原官前後兩任有惠政卒於
官歸櫬無資士民爭賻之達州志稱其學問淵深經術優裕割俸改建崇聖祠講
授子弟多所成就云達州志

同安縣志

卷之二十八

人物錄 鄉賢 四十

許承澎字伯崙貢生以從戎有功康熙間授河南鄆陵令丁父艱服闋起補江南儀
真令在任有政聲當道交薦之除松江府同知以老致仕歸家傳

莊仰旻字彥三號仁軒積善里莊坂尾人康熙庚午舉人乾隆丁巳以明通爲南平
教諭先賢李侗後裔衰微只有男女二人俱沒爲富家奴婢仰旻捐俸募金贖歸
女配於庠生某爲妻男則爲之籲請督學吳華孫取列膠庠又獻治臺十二策於
制府德公德採用之遷增城縣令聽訟無留滯及解組歸縣之羅漢峯被土豪鑿
石挑砂請邑令立碑禁之

郭展綖字紫垂積善寮東人補莒州州同莒巖疆多響馬涖任卽設計擒獲王四陳
大等二十餘人杖斃之行旅又安護理州務兼攝沂縣慎刑簡役窮無告者加意
撫綏丁艱歸莒民無不垂涕舊志

林雲嵐字龍輔號定軒廈門人康熙丁酉鄉薦任江西瀘溪縣邑有漕米三千舊例
每石折銀七錢納官代辦後價昂貴官藉以侵牟雲嵐因時價採辦民免其累乾
隆八年江右大荒民取泥充飢雲嵐勸富民捐穀以濟又申請常平積貯例糶三
存七改糶七存三多方籌畫飢民以安卒年六十一參江志

陳鵬南字雲垂號淑齋康熙己亥年臺灣歲貢四世同居無閒言任連江訓導邑河
久淤捐銀六百兩疏濬之乾隆二年風災 文廟傾圮殆盡鵬南運家貲二千四
百兩獨力修建歲饑邑令戚毀言煮粥賑濟鵬南捐米助之又勸紳士輸穀運米
於明倫堂平糶接濟又偕令竭力搜羅輯成連江縣志制撫上其事晉秩褒嘉請
告歸連人伐石記功建生祠祀歿後爲呈請祀名宦臺灣志 連江志
葉沈翥字季翔少穎異雍正丙午鄉貢補武平教諭清儉自持縣令章文瑗集古贈
之有舉代推高節儒林得異才之句尋以老致仕卒年八十有二鷺江志
林翼池字鳳賓號警齋塔頭人雍正壬子舉人乾隆乙丑進士選湖北來鳳令苗疆
新闢甫下車卽請建城郭興學校躬親考課教以詩書而民知學來俗聘禮只用
鷄酒強婚悔嫁往往滋訟頒示婚六禮書帖式而民知禮居父母喪者旣除服焚
主滅祀教以設龕藏主歲時致祭而民知孝邑苦鹽食價倍於米商人年繳例金
八百兩卻而不受勒石平價民食其德縣毗接西陽州爭地仇殺詣勘定界地方
以寧邑未有志捐俸纂輯獨出手裁以母老乞歸百姓攀轅祖餞累月不得行著
有尙書捷解讀史約編鷺洲拾草遠遊閒居草知以集行世節舊志

同安縣志

卷之二十八

人物錄 鄉賢 四十一

劉承業字垂恢號鶴田祖劉澳徙白石遷居岐西保乾隆戊辰進士遷鉛山令邑饑
奉檄發粟三千石行賑自以拯濟不敷發六千石捐俸墊補民沾實惠鵝湖書院
爲朱陸講學所重新之捐膏火興文教性耐煩劇凡有審斷皆勤慎不屑逢迎執
法有民婦被污不就憤恚自盡翁受賅以溺死鬻獄承業廉得其狀置之法爲婦
請旌承業於書無所不讀文笙簧六籍機杼一家字撫虞歐札仿蘇黃詩詞出入
王孟秦柳性地恬粹飲人以和望其丰采矜平躁釋年甫冠以義經魁閩省主司
歎爲異士殿試以得卷晚置二甲平生口碑轟傳人耳聞其歿咸惋惜云子啟熊
字幼痴少有才名嘗命撰巡道德壽詩一夕成六十章年未三十醉後失足墮井
死著有晞臆吟稿夢亭賦草節舊志 家乘

劉瀚字景若號溪堂東橋人乾隆癸酉科舉人爲學以經濟時務爲重經史外旁及
象緯輿地指畫瞭如遇事持重有沈識身世調度歸於敦本尙實初任建安教諭
修學課士試於鄉者遂多獲雋學兩齋有額穀百餘石胥斗匿之數十年瀚廉問
得底本盡清出調龍溪學再調臺灣彰化學楷模端重士翕然稱之天性孝友在
建安龍溪皆迎其母及嫡兄欣聚於署選興安令地當衝獠獠雜處刁訟浮民瀚

正躬以率恩威並用帖如也治務寧人鄰封全州歲應採木造浮梁送省值水漂沒州牧請檄永安幫造瀚以因循爲例將累民疊文寢格之歲連旱大饑發各社倉聽民貸約豐年繳還僚佐幕客危之更迭諫皆謝卻曰用比獲罪吾無憾焉時民朝夕轉溝壑得貸穀全活以萬計越歲少稔衆感瀚恩爭負戴填倉不匝旬而還如額在興七年次第張弛自出鑑爲興人畫規模重建學宮所屬隄河三十六所秦史祿所開南通灘水北引湘源水運要津也久坍塌舟步底滯無議修者瀚躬覘地形計度程具其事上聞濬之水運由是通利兩入鄉闈分校得士皆知名調署永寧州臨發興士紳老幼攀號塞路揖別至暮始得登輿抵州任未久丁母艱歸居鄉圭壁自愛弗與請託掌教輪山書院三年品望巋然爲諸生講解破疑竇或卽會考題同作皆精的嚴密獨出心裁素不喜爲名詩文脫稿傳觀輒任散失子姪撫拾得古文二十餘首時文四十餘首詩二百餘首藏於家卒年七十三

舊志

陳鳴佩字雨若號紉蘭登瀛人副貢生思敬子由臺灣府學廩貢生任建寧府訓導初署泰寧訓導仗義慷慨修尊經閣濬久涸泮池引水入城以通其脈繼攝連江

同安縣志

卷之二十八

人物錄 鄉賢 四十二

篆祖鵬南嘗司訓其邑遺教在連連人立祠祀焉鳴佩繩武傾貲重修 文廟飭備祭器士人德之贈匾祖孫濟美製錦以榮其旋嗣調龍溪學值臺匪竊發奉委解餉散給義民井井有條寇平委辦善後事宜督造卡房稽查叛產明敏妥洽有不便於民者不憚剴切詳請桑梓賴焉時鳳山 文廟遭兵燹當差務旁午出貲倡修撫軍徐公深加器重薦膺民社議叙一等軍功隨帶加一級應陞知縣素性恬淡不喜就職仍視龍溪學事捐金九百有奇修 文廟建奎樓邑紳士僉集名宦祠晉列祿位以誌不忘甲寅水災卒於官聞者感痛惜焉

舊志

劉先登字二山號靜軒祖璠江西玉山人元至正庚子以科甲授邑縣尹遂家焉十餘世至夢煜天植篤至先登其仲子也少苦學雖疾不輟乾隆戊午舉人授直隸定興縣知縣縣西北孔道郵置供億無虛日會鑾輿西幸所過行幄馳道供奉者賜一級在任五年除蝗賑患平反疑獄拒馬河渡復范陽書院禁樵採楊忠愍壟獎縣民翟氏四世雍睦百姓呼劉佛子當課最自以病免送者塞道後四年奉檄再發直隸卽用未行復謝病歸卒年八十有九著松翠窠試藝重訂吉人遺鐸友竹亭詩文集都中別話重編郭邁周易求義行世

劉氏世紀 陳延香採

劉宗成字念修又字默存幼岐嶷不羣侍父讀書於輪山書院夜深就寢口不絕吟年二十補郡弟子員領嘉慶戊辰鄉薦歷主南安豐州永春梅峯書院講席所至立條教勤校閱從游者多所成就道光丙戌以大挑一等分發保定大名試用時磁州邯鄲成安三州縣地震廬舍倒坍不下數萬大順廣觀察李升齋委任賑恤每十里設廠一所分員施粥嚴加查核凡三閱月官吏夫役無所容奸飢民獲沾實惠是冬東明令侯官林逢年丁艱出缺虧白金三百餘兩宗成接篆悉墊補其篤於梓誼如此東邑與齊豫接壤民情刁悍寇攘充斥宗成寬猛相濟吏民悅服盜賊屏跡越秋調署唐山憫地方貧瘠裁減一切徭役讞獄詳求民隱案無留牘獄無繫囚政平訟理癸巳補祁博安管河州同捐貲修蓋殘署夏秋輒乘馬巡行堤岸強豪估築堤地者悉令清還募僱民夫加工培築前後在祁三載岸無橫決民免沈湮甲午秋代理東鹿令保定守魏笛生龍巖州進士以宗成知文飛札邀校十七州縣卷所拔多名士是冬調署遷安縣距京東五百里爲東北孔道輪蹄絡繹供億綦繁宗成臨事安詳迎刃立解日登堂聽事未兩月結案三百餘通永觀察魏笛生郵書大府有無慚古循吏之稱丙申委南宮縣以民刁訟煩甫下車

同安縣志

卷之二十八

人物錄 鄉賢 四十三

廉棍徒二人懲治之奸宄悚然己酉丁母艱辭官歸里戊戌授南靖教諭捐修

文廟明倫堂勸諸生以敦品讀書飭法之士無所貸士皆服教畏威提學李鐵梅獎爲閩中第一教官著作甚富皆有關風教之言惜多漂於洪水僅遺松翠窠試藝一卷重訂省心紀一卷詩文集四卷卒年六十八子崧齡優廩生嵩齡邑庠生

同前

童浚德字君照乾隆戊申舉人嘉慶六年挑發山東補齊東知縣因解犯逸被議奪官旋獲犯未復職十八年曹州教匪滋事巡撫同興以浚德赴軍營效力叙功奏復原官縣民王守謙等三十人爲殺人者株連在省五六載獄未定浚德請於巡撫訊釋之士民獻慈惠清信額頌其德補費縣旋卒於省費民懷之葬於顏魯公之廟東

道光省志

蘇廷玉字韞山號鼇石馬巷翔風里人少孤力學王南陔紹蘭爲馬巷通判集生童扁試廷玉年未弱冠屢冠其軍輒以遠大期之年二十一補博士弟子員嘉慶戊辰舉於鄉甲戌成進士點庶吉士散館改刑部主事勤於訊鞫有能聲道光丙戌擢員外郎丁亥京察一等陞郎中律例館提調明年記名以道府用己丑補松江

府知府未抵省已署江寧府知府先是安徽建德典史秦學健京控株連多人皖訊五年不能結總督陶文毅公舉以相屬廷玉窮日夜獨鞫之學健服任松江甫三月調署蘇州府吳賦重甲天下漕徵尤甚民重紳輕廷玉飭所屬紳戶照納民戶減完民稱頌焉次年陞陝西延榆綏道署江蘇督糧道壬辰始受代行次丹陽調蘇松太道又陞山東按察使平亭多要獄高密李孟山殺姦一案府縣均以擅殺罪人擬絞廷玉判曰姦所殺姦且在登時於律應勿論破械釋之府縣胥役私設押所曰老虎洞控案稍有牽涉輒私禁勒贖久爲民患廷玉廉得之親往勘辦數百人皆髮長被面無人色立縱之去癸巳調四川按察使署布政使甲午回本任川省幟匪橫肆大邑李碑喜等帶刀強搶婦女輪姦捕治置重典匪皆斂迹乙未峩邊夷匪出巢焚掠布政使李義文督師往剿廷玉兼理藩條捐廉萬金濟餉賞戴花翎丙申陞布政使其明年馬邊屏山雷波猓夷又大出劫掠總督鄂山調兵萬餘兩路進攻廷玉進曰師行逾萬而總督不親往事權不一恐債事鄂山以老病謝兩路師卒無功而返戊戌二月成都米價驟翔時當青黃不接人情洶洶有不可終日之勢廷玉以本省頻年皆豐稔且兩湖江西亦有年藏穀旣多人

同安縣志

卷之二十八

人物錄 鄉賢 四十四

無轉運此必奸商囤積居奇所致因飭各縣排日巡察鄉場囤戶責令出糶又倡同官捐廉買米入城假爲商販減價發售民乃帖然秋鄂山卒於任廷玉署總督加兵部侍郎銜因念四廳猓夷擾害蜀都恒千百爲羣恣意淫掠邊民水火已及十年歷任總督雖剿撫兼施皆粉飾邊功傳會了案非發兵剿捕不足以張國威而除民患遂會同將軍凱音布提督張必祿具疏瀝陳并單銜附片以蜀中賦則甚輕請先發帑金三百萬供餉川賦則每一兩加征五錢勻十年攤還部款疏入朝議以搖人心傷元氣切責之降廷玉按察使拔去花翎凱音布張必祿及臬司多歡皆交部嚴議朝廷慎言用兵尤惡加賦以其激於愚誠勇往自奮要非俯仰隨人者所能及故終憐其戇但左遷焉是年十月廷玉在總督任內值貴州懷仁奸民穆繼賢等妖言惑衆嘯聚五百人作亂川屬綦江實與接壤知縣毛輝鳳外委章泗明帶兵勇三十名與懷仁縣王鼎彝會捕泗明爲所戕是時懷仁文武思委過川省轉以川中匪徒越界滋事爲詞巡撫賀長齡據以入告廷玉不與辨仍檄總兵張作功等入黔會剿并濟之軍火穆繼賢就擒論功不及川省廷玉亦不與爭其遇事善持大體類如此庚子內用大理寺少卿旋命休致回籍三年英

吉利擾上海以四品京堂起用辦理蘇州糧臺計在蜀七年嚴辦匪徒民賴以安者數十州縣賑卹饑饉民賴以生者十餘萬戶去蜀之日百姓遮道萬人泣送廷玉亦依依淚下在吳齊亦以公明慈惠稱次年歸家頗留心時事革鹽商簽攤之苦適值英夷窺廈門招神鎗教式於福州五虎門訓練土氓皆成勁旅又捐資築土堡於泉州海口以防竄突咸豐壬子卒年七十歲著有亦佳室詩文鈔從政雜

錄

采黃家鼎傳鼇石年譜亦佳室詩文鈔退叟家書墓誌郭有家訪稿

蘇瑞書字少伊廷玉孫咸豐壬子優元會粵匪猖獗八閩震動舉辦團練地方安堵實授松江知府未接篆卒

蘇族譜有家採

同安縣志

卷之二十八

人物錄 鄉賢 四十五